

借閱此書
請勿污損

本館
不借

上海圖書館藏書
館書圖

上海图书馆藏书



A541 212 0009 3903B

吳序

王子勝時。足跡半天下。前後紀游共四卷。以授其友吳子。在蕭寺逆旅。與客共讀之。卒業。客作而歎曰。樂哉王子。極天下之高深以爲遊觀。而文章能發其勝。視柳子厚蹙蹙一州而求水石於數里間者不遠勝乎。吳子愀然曰。王子之遊。正王子之憂患也。何樂之有。夫王子少有大志。思翱翔紫清。建非常而垂不朽。詎意鰲極弗奠。三山播蕩。鳳羽見羅。鷓鴣并斃。於是薤青骨瘞。苞羽皆傾。陋巷饘粥。資以贍之。資生無餘。六喪未舉。勁骨強項。不得不因報劉而屈。委曲從俗。貌愉神瘁。山川滿目。皆岢岉也。繁卉皇皇。皆桑棘也。以是爲樂。非知王子者也。客曰信然歟。則葬親以後。奚爲復出也。吳子曰。夫倫紀固相依爲重者也。友朋之倫。輕於君親。然使有濟於君親。則友朋亦重矣。晏子春秋

曰。養及其親。則死之。吾藉彼力以葬親。縱不以死報。而遽謝絕其將伯之請。豈人情哉。故王子之可仕而不仕。其素志也。不欲遊爲親也。遊至六七。推愛親之餘。不敢負良友也。彼曹丘以口舌雇金錢。茂秦以篇什當羔鴈。皆王子所吐棄。而不爲者矣。客曰。夫人樂至則詠長。哀來則聲咽。文爲心聲。形乎所感。今王子紀遊之作。古骨雋采。驚動一世。豈其不樂而能爲之乎。吳子曰。此非其樂也。才有餘也。今夫樵者腰鎌。牧者折箠。足濟於用矣。及使王孫爲樵牧。則杖龍淵以刈葵藿。持步光而磨雞豚。旁人駭之。而彼不過出所固有耳。王子之文章。樹骨於兩漢。插采於晉宋。皆越遊時淬厲所成。後且恣意以言。無不合轍。譬伯牙鼓琴。久入化境。豈專恃山水而後成其窈眇哉。客曰唯唯。吳子遂書其語。以爲序。吳麒題。

序

秋風正厲。索居無聊。因至卡德路之舊書肆。購舊籍以遣興焉。過一攤。冊籍疊陳。刊圖狼藉。架之角。瞥一書。封皮已碎。塵漬斑然。翻閱之。則王子勝時之漫遊紀略也。執讀一二頁。覺其文采斐然。亟以國幣一角購之歸。窮一日又半而畢閱是書。

王子勝時。名士也。性情清傲。熱情充溢。處事維誠。交友重義。擁
有熱腸。而以冷眼觀世。讀王子之書者。當可想見其爲人。當明祚之陵
替也。江山易色。王子不欲出遊。而不得不遊。誠如吳子麒所言。貌愉
而神瘁矣。從來貧困威逼。英雄失色。衣食窘人。名士低頭。且王子抱
經世之才。而終未能大致其用。此爲千古所同憾。讀者其亦有感於斯

文。

全書計分越遊。閩遊。燕遊。齊魯遊。粵遊。楚遊諸篇。均其作幕賓時所紀遊蹟。凡目有所見。耳有所聞。心有所感。足跡所經。罔不筆之於冊。於各地之風土民物。大至一山一川。小至一舟一輿。莫不有系統整然之紀載。讀其閩遊一篇。而神往於其清茶之解渴。與佳果之可啖。讀其齊魯遊。楚遊諸篇。則巍峨端肅之泰山。林木蔭翳之武當。高寒奇險之峨嵋。洎乎蜀道難行之真情實況。莫不繪影繪聲。如身歷其境。王子於情景物態之描摹。技術可謂工矣。

此外。如明末清初生民塗炭之慘况。清廷之措施。與吳三桂叛清之始末。於粵遊。楚遊諸篇中。亦均有簡賅扼要之紀敘。當時情景。乃王子所親歷。當爲信史。可以徵信。故是書也。小之足以供臥遊勝具。大之

足以補輿志史乘之闕。

如是好書。如是妙文。烏可不傳。爰經整理。以公於世。讀者諸君。其弗以余爲多事乎。是爲序。

韜漢

廿七年十一月十七日書於醉月軒

王勝時遊記目次

越遊	一
閩遊	五
燕遊	二二
淮遊	三〇
齊魯遊	三六
粵遊	五〇
楚遊	六二

王勝時遊記

越遊

余年十有四。始師事大樽陳先生。時歲在壬申。先生方以古文詞倡起東南。墻宇高峻。士之及其門者。造次不能自達。予以童子隅坐。晏如也。先生成進士歸。而廬居三載。益切劘於學。時時過從。誨有加焉。及先生之官越州。予遽先慈喪。苦次疾作。先生聞之。貽書見慰。且曰。越中山水之勝。晨夕寓目。舍中清曠。庭除烏雀。殊宜書史。敢屈從者。予初失恃。復嬰疾。未忍去倚廬。請於先君。先君曰。師命也。孺子勉之。余遂以癸未春適越。越州治。負臥龍山。李郈居西。舊有宛委齋。先生築堂於其前。漳浦黃公以八分書署之曰。清音。又贈言題柱云。

愛物若騶虞。指佞如屈軼。黃公者。先生座師也。會稽羣山。皆在堂前。遠岫參差。雲物回互。昏旦萬變。郭內萬井鱗次。樓榭繡錯。亦有因山成墅。亭亭隱見。堂中周列圖史。橫陳琴几。予處堂之右。左則先生寢室也。越中吏事清簡。旦起出堂。皇治簿書。不移晷而畢。歸坐堂中。讀書自若。遇快意。輒呼余並讀之。或命余檢視某書某卷某事摘發靡遺。有所著撰。端坐凝神。間一微步。拂几疾書。授予高誦。相與鼓掌爲樂。或授簡於予。予遜謝不敏。先生勗之。一言之獲。必加獎掖。間出以示座客。予心愧焉。時山陰劉忠端公方里居講學。先生赴講席歸。則又爲予極論天人性命。指予請質所疑。窮探幽蹟。嘗自作往復數次。終日亶亶無倦色。每日晡。先生秉燭讀書。聲琅琅徹戶外。夜分未止。予嘗假寐以待。或遙呼予。問云何。予從寐中起應。先生讀書必至午夜。

。繼以談讌。及就寢。則雞且鳴矣。旋辨色而興。其勤若此。考功夏忠惠公聞之。貽書相戒。以葆生宜子爲言。先生感其言切。乃損三之一。聞漏二下卽出室談讌。縱論古今治亂成敗之數。下及當世之務。有慨于中。則太息而起。或環柱而走。往往罷酒。亦已漏三下矣。是歲秦寇日熾。而楚帥左良玉潰兵南下。吳越岌岌震動。夏秋之際。予從先生往還虎林。慨時撫事。悒悒不樂。自此遂有乞歸之志矣。先生性高簡。門無雜賓。至是。時時稱病謝客。予所睹記一歲中。以講學至者。婁東張受先先生也。以談風角至者。閩中蔡山人無能故相高陽孫公客也。以治神器至者。海上陳博士仲台。故相徐文定公甥也。我鄉戚友以遊覽至者。顧偉南張子復子退曹魯元謝禔玄宋轅文周宿來也。周子則與蔣子大閔先余從越遊者也。其同舍者。惟盧鹿田與予二人。越中名士升堂者。王玄

趾毓著輩不及數人而已。歲暮先生以督軍精赴南都。予請歸省。甫抵里而聞婺州許都之變。當事亟檄先生歸撫之。降其衆而還。時甲申之正月也。事載先生之年譜中。予馳赴越。則變已平矣。仲春先生量移南銓。士論皆失望。而先生以得遂歸養志。聞之忻然。亟命治裝。未行。旋以平婺變功。改除黃門。非先生意也。先一歲冬至。吳越間大雷電。是春陰霾。積月不解。去越之日。大風拔木。雨暴至。如盛夏時。蓋崇禎甲申三月十九日云。

客曰。子適越。曾未覩夫越之名山大川。何言遊。曰山川不以人重哉。甲申以來。越之賢士大夫。先後殉國者。非先生所嚴事。卽誼友也。先生事大母歿。而後終厥志。從先生者。未有與也。此宋景之徒所爲憮慄於遠行也。

閩遊

紀時始自壬辰孟夏。迄于癸巳嘉平。約二載云。壬辰仲夏朔度嶺。午日過建州。七夕在莆中。中秋九日。皆在三山。長至在南康。時序備矣。紀地由嘉禾武林之富陽。睦之桐廬。婺之蘭溪。衢之江山入閩。古稱七閩。今列郡八。予遊其七。其入也。自建州下延津。以達於三山。自三山取道長樂。過福清至莆中。又自惠安至泉南。過同安至清漳。其出也。自延津至順昌。至樵川之光澤。入江右境爲建昌。爲撫州。爲南昌。爲南康。入江南境爲皖城。秋浦。牛渚。至于白下以歸。

紀山川。自錢塘至江山之青湖。皆水也。濱江諸山。遠近不一。近者爲七里瀨。釣臺。宦遊者戒勿登矣。自青湖至建之浦城。皆山也。山都以嶺名。仙霞特著。叢山深阻。盤紆回互。高入雲表。深臨絕壑。行者螳

緣而上。猿引而下。仰視前峯。高踰於後。一日之間。登頓數次。稍就夷處。疏爲衢術。列次邸舍。往時商旅出途。朝夕闐咽。亦有當壚調笑。倚市徵歌。兵燹之後。空山設戍。猶存頽宇。至者如歸焉。初入山。聞泉聲淙淙。在石齒間行。久之聲益急。輕者鳴絃。重者沸湯。土人因其高下。引流委折。阡陌鱗次。是爲梯田。或乘流導澗。壘石激湍。爲水碓水磨之屬。亦山中之水利矣。自浦城以下水也。水都以灘名。黯淡特著。亂山夾峙。衆流奔注。匯爲一川。建瓴而下。曲者蛇行。直者矢激。一灘未至。先聞聲若崩雷。至則峯巒矗立。前若無罅。目不及瞬。已失所在。每過一灘。戰慄失次。氣息未屬。而前灘又至矣。如是者以累十計。及將至。黯淡望不見石。意以爲夷也。忽雷聲自水發。舟若躍起。自上入下。浴浪而出。乃知石立水底。水激怒飛。險倍他灘也。行

者至此。莫不驚魂失氣。僵臥不能起。或舍舟從岸。踰險乃濟焉。至延津則汀邵之水。來會合流。下三山入於海。舟行至三山之洪塘。陸行入會城。城中烏石山。石色如隃麋。神光寺在焉。出會城至南臺。閩越王之釣龍臺也。孔道自烏龍江亂流而濟。亂後郵廢。道蕪不行。乃順流下長樂。陸行至福清。由浦。以抵於泉漳。皆從海壩行。無山川可紀云。自延津溯流而上。至樵川之光澤灘。勢稍殺。自光澤山行一日。出杉關。崗巒平衍。溪流渟泓。行旅便之。至於石峽。壽昌寺在焉。是爲豫章新城之境。自此皆水矣。由彭蠡以入於江。

紀風土。上遊四郡毗連浙左江右。襟山帶溪。霜雪之所及也。自三山下。地皆濱海。隆冬如夏。草木不凋。蚊蠅營營。近乎南粵矣。壬辰孟秋過莆。莆人方再蒔禾。秋暑彌酷。晚禾賴之。癸巳元日。在清漳偶過

顏氏廢墅。惟時桃花零亂。梅萼初舒。叢桂競芬。有類秋日。四時之候。亦以地變也。是夏在泉南。其土赤墳。埏埴如赭。壁宇赫然。增其煩歎。以手按地。氣蒸蒸然。此中男女躡屐。誰曰不宜。而泉漳之間。弓步絕跡。殆南越之餘俗歟。諺云。泉南興女。蓋泉南士女靚飾袷服。有彼都之風矣。優伶之屬。泉人稱勝。亦猶吳歆之尙崑山也。傅粉珥耳。冶步遲聲。土人聞之。莫不鼓掌歎絕。其音侏離。客靡得而辨焉。夫樂操土風。固其宜矣。若乃五方區別。語言自殊。是以仲遠旁通風俗。子雲博採方言。其能彼我通懷。無煩舌人者。亦賴於同文也。閩音鳩舌。覲面茫然。惟有六書諧聲可達。乃彼方人士。莊嶽靡聞。童而習讀。取便鄉音。遂使聖經幾同梵筴。宜其出對諸方。談功罕著矣。有若文翁之倫。廣延方聞之儒。分詣學宮。是正文字。辨以四聲。革其俚譌。漸及

塾師。以次釐革。數年之間。學者成誦。論而升之。音韻既正。庶幾語言可得而通矣。雖狂瞽之卮談。不無裨於風土。抑亦通方之所不棄也。故附述焉。

紀城郭。諺云銅延平。鐵邵武。予皆登焉。延平城東山腰。城中衆嶺參差。民居若蜂房。一家之內。升降崎嶇。舟中望之。市廛歷歷。行者如繪焉。道間置竹。通中引泉。上下灌輸。蛇行蚓伏。城市之民。巖居如飴。亦一異也。談守禦者。亦無虞於汲道矣。邵武城上有樓。曰詩話。以郡人宋巖羽名。非論詩所也。予去漳。漳城夷爲平陸。此卽閩禍之至烈云。

紀關梁。閩關三。自江山入浦城者。曰仙霞。自建昌入光澤者。曰杉關。自信川入崇安者。曰分水。俗稱大關。郵傳所出。亦走武夷道也。是

時山魘塞道。輜軒久絕。遊者亦望岫息心矣。予所過二關。杉關爲平。仙霞最險。地介衢建信州之交。萬山起伏。山勢至此。兩崖斗絕。中通鳥道。仰高俯下。因險設關。裁容一夫。今已頽廢。閩人言。先年鄭氏望風送款。預撤守兵。啓關以俟。故入閩者無血刃焉。及余入關。山中伏莽復發。血殷殷漬草間。客寢一夕數驚矣。明年出杉關。時方秋霽。宿霧初收。烏柏丹楓。風迴葉下。微湍碧巘。左右映發。泊乎夕照入山。如在霞表。弭策至此。忘其行道之遲矣。客言仙霞秋色尤麗。惜夫緩步易遵。而勞歌難繼也。閩橋巨者。木一石二。在建州者曰通都。下壘巨木。上屋之。商賈之所聚也。時不戒於火。復搆如故。在泉南者。曰萬安。俗名洛陽。蔡忠惠公所建也。架石江面。修三百六十丈。廣丈有五。諺云洛陽沙平。填滿公卿。先朝之季。潮退沙見。驗矣。橋下有忠

惠公祠。公自書碑二。分列左右。石光可鑑。公墓在仙嶠境內。祠蓋爲橋立也。在漳南者曰通濟。亦曰虎渡。俗稱江東。其修三百丈。時爲兵毀。構木以濟。

紀舟輿。閩舟曰清流。縱可容四人。橫不能伸。偃坐篷下。舟子三。前招。中槳。後舵。招形若木刀。置于舟首。下水過灘。左右動搖。捷過飛鳥。少失尺寸。觸石立碎。一舟之命繫焉。放乎平流。乃蕩槳而遊。泛若輕鳧矣。上水則舍招用舵。皆緣岸行。上下不相抵也。二人如牽一纜。攀崖緣木。遇灘高水湍急。衆舟子共肩舁送之。一舟旣上。後舟始進。故上水舟子。率裸其下。深則厲矣。下水程一日。上水過倍之。大率視水之盈縮。水盛則石伏。縮則見。欲縮不縮。若明若滅。下水者恆難之。長年三老。心手相應。所謂巧者。不過習矣。客登舟相戒勿晨語。

。平旦鼓柁寂爾。銜枚久之。乃啓齒焉。行至地名水吉。始登廟祀神。殺雞瀝血。膏神脣。復提其耳。曰。神本重聽也。故舟子亦每以手語。山高水疾。風不得主。不設檣帆。舟子力居多。諺曰。紙船鐵梢工云。官舫則略具篷牕而已。其制不能加廣也。稍大者。曰艚篷。延津以下乘之。然其用不及清流。清流者。汀南屬邑。邑有九龍灘奇險。邑人因以善操舟名曰過九龍。則黯淡如砥耳。予未至汀。心疑之。後遇汀人云。九龍懸流直下二十餘里。灘有九。以龍名。舟行至此。客皆負擔而起。舟子亦率而從之。委舟於灘上。灘上土著。世以放舟爲業。爲之放舟。下九灘畢。客與舟子同就登焉。然恆誇於人曰。清流清流云。閩輿大者如椅而縮其足。小者曰兜子。客行皆乘之。削木爲板。廣不半尺。左右短絙。貫於二竹。客坐板上。後負襍被。輿夫肩舁。掉臂而趨。其疾若

風。及登山。則簸蕩良久乃上。將至半嶺。卽委於地。任客策杖矣。旣渡嶺稍夷。復舁以疾行如初。凡官吏及老幼婦女之屬。略設帷蔽。上下不下輿。客有羸不任勞者。驕惰不能步者。爲厚其值上下堅坐自若。予旁視之。上則仰如倒植。下則踵頂相接。曾不如策杖之安矣。

紀物產。穀之屬。上游山田。濱海水田。一歲稻再熟。地氣濕熱。越歲紅朽。家無二年之積。泉漳人滿。每告糴于粵。航海而至。壬辰秋。漳城被圍。斗米至五十金。人相食殆盡。布帛之屬。閩不畜蠶。不植木棉。布帛皆自吳越至。泉人自織絲。玄光若鏡。先朝士大夫恆貴尙之。商賈買絲者。大都爲海航互市。其肆中所列。若哆囉呢。嗶嘰瑣袱之類。皆自海舶至者也。番布橫廣。其堅韌遠不及吳產也。葛亦不如粵。以蕉雜之。益脆不任用矣。苧諸郡有之。邵武將樂永春者佳。錢幣之屬。建

延泉民間皆用古錢。俗名老錢。泉人所用。崇寧通寶。一當五。其曰番錢者。則銀也。來自海舶。上有文如城堞。或有若鳥獸人物形者。泉漳通用之。聞往時閩中巨室。皆擅海舶之利。西至歐羅巴。東至日本之呂宋長崎。每一舶至。則錢貨充物。先朝禁通日本。然東之利倍蓰于西。海舶出海時。先向西洋行。行既遠。乃復折而入東洋。嗜利走死。習以爲常。以是富甲天下。自海禁嚴而閩貧矣。玉石之屬。水晶出清漳山中。五色畢具。莆中有石。類端州石硯。三山之壽山石。類青田。刻篆勝於汀石。將樂石。纍纍作鳥獸形。土人常以餉客。曾見有紺紫色者。器用之屬。德化陶器。純素微類定州。其質厚重。不及浮梁。或作仙佛像。今浮梁陶。反效之矣。楮延建諸郡山中。皆造之。粗者以藁。細者以竹。其用廣。順昌將樂特著。草木之屬。茶出建州武夷山者。宋時貴尙

之。屑爲龍團以賜大臣者是也。先朝貢御稀。而仕閩者尙以茗。徵取不止。山中黃冠苦之。閩俗茗飲却新嗜陳。將無龍團遺意歟。一種葉大不中飲。亦曰茶。秋花落。實採之作油。可食可燃。尤宜澤髮。此與茗茶同名異用者矣。蘭閩山皆有之。名品以百十計。花莖俱白。夏秋再花。其春花者。爲春蘭。一莖一花。香特甚。然則一莖數花者。疑皆蕙草也。其曰樹蘭。曰珠蘭者。非蘭也。以其香同亦蘭之矣。茉莉在閩香過於蘭。及其度嶺。蘭香遂爲百卉冠。亦去鄉而貴之徵也。佛桑花備五色。土人豔其殷紅者。故亦曰扶桑焉。竹有甘苦二種。其筍曝以行遠。其籜亦市之。筍生無時。秋冬遲久乃長。非若他方春萌旬日齊本也。建延間有方竹。延津之朱竹。則尤異云。椶櫚諸山皆有之。歲取其皮。爲笠爲衣。以避風雨。亦爲坐臥之具。是草木之有裨器用者矣。一種小而堅者

。可爲扶老。蔗似荻而甘。治以爲糖。精者如冰。細者如雪。融其粗滓。則色若錫。而色黝。厚薄殊焉。斯下矣。卉族之有助於味者也。蕉在閩易蕃。冬夏一色。一歲之中。大可以拱。抽幹作花。含苞類菡萏。大如盞。每日開一瓣。其色殷紅。中有穗如蓮鬚。至暮墜地有聲。次第開落。結實纍纍如豆莢。剖食之。甘冷如崖蜜。曰蕉子。夏秋之交。以充果實焉。一種小者曰美人蕉。花叢生如萱草。實如豌豆而堅。今爲江南籬落間物矣。其曰鐵蕉者非蕉也。植以鐵屑。鎔鐵入之益茂。土人曰。可以辟火。榕不材之木也。度嶺始見。故三山亦名榕城。鞦韆臃腫。大踰數尋。然視粵榕。則不足爲兒孫矣。果蓏之屬。荔枝。福興泉漳四郡皆有之。莆之楓亭者佳。譜稱上品。陳紫宋香。予以六月至三山時。荔枝初熟。綠陰蔭日。丹實垂垂。就樹摘噉至飽。謂色香味全矣。有名者

。曰勝畫。無核者曰蜜丸。七月至莆。有餉楓亭荔枝者。香盈一室。清甘無滓。核細如丁香。問之果宋香也。訪陳紫。曰絕久矣。明年六月在泉。泉之名品曰狀元紅。實大而甘。然不逮宋香也。乃知盛名非虛矣。龍眼。福清者佳。八月始熟。曰荔奴云。橄欖初實。味淡核脆。及秋乃堅。土人護以蕉葉。盛木器中。輕舫星挽。晝夜兼程。以售於四方。舟中弗飲酒。云。勺酒入舟。則皆浥腐。世俗以諫果解醒。物之相制。理或有之矣。柑橘一類。俗以黃者爲柑。丹者爲橘。閩產爲天下最清。漳尤稱佳。先朝盛時。閩橘之美。達于京師。歲時傳柑。非此不樂。及予至漳時。戎馬在郊。橘刈爲薪矣。其名蜜羅柑者。非柑類也。乃佛手之屬耳。佛手出永福者佳。初橘味殊甘脆。大者兩手相承。修過纖指。移植外方。輒拳曲不伸。漸倫蜜羅矣。柚大如斗。土人謂之苞。秋熟瓢赤

。他若陘山梨夫人李。建州之蓮。皆閩之佳果也。蓀若茄茹籬豆之類。凌冬不凋。植立如樹。越歲復實。番薯蕷。相傳來自海外。皮赤味甘。可生啖。蒸食如飴。曝而屑之。可作餌。昔我鄉徐文定公著農書。極言其功。可以濟荒。今予嘗之信然。亦蹲鴟之屬也。惜其畏寒。他方難植耳。又有落花生者。花墜地而生。莢似豆而實大。今江南亦植之矣。虫魚之屬。鷓鴣。閩人以爲常膳。在泉南時。有以饋方伯周公者。開籠放之。後歸。渡烏龍江。聞鳥聲若云行不得也哥哥者。舟人云此鷓鴣也。羈旅聞之。悽然心慟矣。鯪鯉生山中。在漳時曾生致之。形殊惡。臘之可食。石輪生山中。似蟾蜍而大。山鰻似蛇。而有脊。泉人以爲珍味。龍虱出長樂。直蛻螂之屬耳。餘皆不敢嘗也。海錯以江瑤柱爲第一品。七月在莆食之。清香迴絕。昔人稱之。非虛矣。西施舌甘美。香螺甘脆

亦其亞也。他若石首。四時皆有之。鱒似蟹而大。以及螻蟻之屬。並爲常膳。客皆安之。鱟魚形似笠而長尾有足。介族也。血碧色。不中食。龜脚非鱗非介。以形似名。

閩爲山海之國。珍錯所萃。厥品萬殊。旅人桑宿。何足侈談。聊疏所見。以備遺忘。若目所未及。則不詳焉。

紀遇。不期而會曰遇。固友也。而至於他邦。則亦遇之矣。遇於武塘者蔣篆鴻。遇蔣大鴻於禾中沈幽歧家。皆同門友也。時大鴻避地自稱杜陵云。遇於桐廬者張無近。天如先生弟也。遇於閩者。宦遊則我鄉宋中丞轅文。時爲學使。大梁周司農元亮。時爲方伯。靳陽汪蘭友。時南平令也。客遊則我鄉張處中。范樹鏞。葉子聞。王虞倩。俱偕轅文至者也。大梁閔伯宗。宮用唐肯堂。白下羅星子。王式之。黃岡萬允康。金谿吳

仲升。臨川支長卿。東鄉艾上才。光山熊子布。真州張子京。皆周公客。及公弟靖公。公之子雪客也。閩中則三山陳昌箕。陳克張。徐存永。陳開仲。龍季許天玉。廖攻瑕。莆中宋去損。皆以詩文名。天玉我師友。夏忠惠公門人也。三山林異卿。許有介。郭去問。以書名。異卿時年七十餘。故相福清葉文忠公客也。汀南楊巨源之繪佛。莆中郭無疆之寫照。江緝侯之談星。吳平子江皞臣之古篆。江尤善攻玉。本新安流寓於泉南者也。漳南孫細娘之自鳴鐘。莆中姚朝士之測晷儀器。皆一時絕藝云。若莆中余賡之。則從祖太僕公門人。及以詩書來約晤於莆。予不及待而未之遇者也。莆前輩以著述名者。其書充棟。近則石倉曹公學佺。括地博擅鄺桑。廬江何公楷。箋經義。精王鄭。若乃銅山黃公道周。絕學榕壇講業。理窮元象。道貫羲周。尤私淑者所寤寐而求也。曹何俊胤

。尙守一經。銅山二子。沒於圍城。聞有藐孤。無從詢訪。搜採遺文。如獲鳳羽。嗟夫。其人往矣。我不得而見之矣。讀其書焉。斯遇矣。抑有遇焉。予在漳。漳友王生美厥來告曰。子之友。徐君闇公者。寄語詢子。嗟夫。其人在焉。亦不得見之矣。傳其言焉。亦遇矣。又有遇焉。予在三山。過第一樓。望見一人前行。玄衣廣袖。鬢髮如漆類女子。而束髻卑小無冠飾。趨而視之。鬖然于思也。驚問之。則琉球中山國使者也。嗚呼亦遇也。遇斯怪矣。所謂夏失而求諸夷者也。

瓠史曰。昔者夏忠惠公。嘗宰閩矣。乙丙之際。徐孝廉闇公奔赴行在。茲二公者。我道之君宗。而七閩之光也。越數載。予遊於桐。鄉之祀猶有存焉。而仲連之風邈矣。子不曰。道不行。乘桴浮於海。從我者其由歟。

燕遊

予嘗四遊燕云。乙未之役。悲夫。己亥憊矣。壬寅癸卯困也。次第書之。

先是癸巳冬。自閩歸。甲午秋。痛懼先君之變。時先大母在堂。向予泣曰。汝祖若父不幸晚更喪亂。相繼捐館舍。家有六喪。未歸淺土。我行且夕從若祖。目不瞑矣。汝盍走四方。求一杯焉。予泣無以應也。是冬。閩方伯周公。入爲御史中丞。自閩過吳。先期以束帛來唁。且訂北遊之期。會仲弟以哀毀成疾。心忤忤動。猶豫未忍決。先大母復以前語趣之。且曰。仲孫素強無疾。汝何憂。遂相向慟哭。告於几筵而行。至白下。則周公治裝俟矣。時乙未之正月也。自廣陵趨盱眙。渡淮。過泗。虹。靈。宿。入豫州境。由宋城直走大梁。周公故家大梁。自河決後十

有四年。而始歸故鄉。令威重來。城郭都非矣。予策馬行。見道上有二鷗吻出地。問之。則文廟也。南至相國寺。大殿簷溜當胸。迦釋巨像。裁露肩肘。北至虛左臺。相傳古夷門也。鐵塔巋然。傍空而立。黃沙白草。殘照頽城。徘徊久之。淒然魂斷。若乃周藩故邸。廢爲棘院。梁苑汴宮。興哀離黍。抑自古而然矣。渡河宿酸棗。過衛入鄴。涉淇濟漳。漳水湯湯。無復三臺遺址矣。過磁州。至沙邱。入趙境。趣道邢洛。常山。上谷。涿鹿。以達於燕。已及仲春。舍館甫定。有郵家書至者。啓之。則仲弟訃音也。痛哉。予以棘人羈旅。意忽忽不樂。後聞令原之難。益慘割。不能自止。方是時。周公初入爲中丞。四方之客。麇至長安。貴遊亦有下問及予者。予嘗稱疾。閉戶謝客。公卿之門。絕無王子之跡也。居無何。公遷少司農。俄以人言罷。予自傷負土無力。失策遠遊。

。不圖重有弟喪。索米何益。滋倚閭憂。歸志遂決矣。是歲當上計期。我鄉親友之徵公車者。或待除。或報罷。皆次第歸里。周公罷官後。賓客皆散。予不忍言去。遲回久之。至仲秋乃與公別。與二黎子同歸焉。二黎者。閩之汀南人。大黎子愧曾亦以公車報罷。在都與予相遇於燕邸。掀髯論古今大略。娓娓不倦。予旅愁偃蹇。索居塊然。時時過從。投分厚善者。此君而已。至是。二黎子道存之官南昌。兄弟同載。予因附焉。從潞河登舟。不一月至廣陵。黯然而別。及抵家已冬暮矣。入室長號。仲弟安往乎。痛哉。半載之間。仲弟復從我父逝也。天實爲之。謂之何哉。踞請先大母謝無狀。復相向慟哭。子路曰。傷哉貧也。生無以爲養。死無以爲禮也。

己亥暮春。予再遊燕。行次白下。遇周雪客。知其尊人司農公方在請室

。而公弟靖公。亦以急難北轅矣。渡江由滁陽踰清流關。自臨淮渡淮。趨宿州符離。過徐王園。閔子墓至彭城。渡河過利國監至臨城驛入魯境。時我鄉顧震雍治河沛上。林平子客焉。枉道訪之。信宿而別。舟行至任城。復策蹇而北。自汶上。東平。東阿。高唐。在平至德州。取道瀛鄭至于涿鹿入都。已初夏矣。至則訪周公于請室。靖公在焉。未幾而汀南黎子愧曾亦至。靖公素有酒人名。雖在令原。不廢雄飲。三人者道故歌泣。同於荆高宋意矣。時閩人以公事株連。就逮纍纍。若許有介。宋去損。皆舊友。事未解而去損歿。良可悼云。居久之。而聞京口之亂。京師大震。東南之客。皆惶怖思歸。至有泣下者。予笑解之曰。何憂之過也。度此時兵已退矣。聞者咸以予言爲妄。旣而兵果退。客問其故。予曰。我在閩二載。頗悉情僞。水陸異宜。失地利矣。猝然深入。謀非

素定。安能持久耶。客乃服。是時江淮之間。脊脊多事。蔡襄敏公再起視漕。赴淮將行。問士於陳黃門偕六。陳公者。予素交也。因以予對。蔡公立趨予行。乃別周公於請室。別靖公於邸舍。倉卒揮手。黯然而已。時仲秋之二十有四日也。瀕行。周公兄弟。各出其詩屬予序。予憶與乙未出都。先後同日。於序公詩因及云。是行也。老親本以捧檄命之。黽勉就道。世途多舛。飄泊三時。所遇者非患難之故人。則羈棲之素士。無貂可蔽。無金可盡。嗣宗之淚窮。而仲宣之賦作矣。故曰憊也。諸詳淮遊紀中。

壬寅季春。自淮浦登舟。渡河至宿遷。蔡公先世本邑人。先朝洪武間。以開國功世官遼左。歷數世而公仕於淮。祖墓後裔猶存焉。故公於邑人有加禮。至是將歸。其宗族親戚畢會。三日乃行。宿邑古下相地。河干

有項王祠。公爲修其廟貌焉。時公以移疾歸。挾楚醫饒生與俱。生嘗遊黔中。能述滇黔間事。舟次沅河。聞滇師入緬。生不覺失聲曰。此趙氏之崖山矣。予目攝之。坐客莫之知也。公之客共載者。有瀨上宋生。亦知醫。白下柳生。王生。善諧談。包山秦生曉音律。舟行殊緩。時漸入夏。舟中休暇。則命柳生談隋唐間稗官家言。其言絕俚。柳生侈於口。危坐掀髯。音節頓挫。或咤叱作戰鬪聲。或喁喁效兒女歌泣態。公嘗竦聽之。僮僕以下。咸助其悲喜。坐客莫不鼓掌稱善。率至夜分乃罷。予往往假寐而已。自清源以北。公每過其微時舊遊地。輒爲泊舟。抵掌指畫。敘述往事。召問其里中父老。語移日不倦。或策騎往視某刹。今若何。卽捐金施之。河干髡徒聞之。伺公舟至。卽胡跪作禮丐施。久亦厭之。驅之復來。或尾舟行終日。卒施之乃去。一日舟次興濟廢邑。先朝

昭聖張太后故里也。有崇真宮。弘治間建。今亦蕪廢。道士出太后遺像示公。公畀之錢數百而已。予笑謂客曰。野道士真不解人意。宜爲髡徒所訶矣。至津門。而公之子學士君偕其子弟親友皆來會。及入都門。時已仲夏。在道凡閱月云。居久之。賓客稍稍引去。予辭歸省。公慨然執手曰。子從吾遊且三載。而兩世之喪未舉。我愧矣。予有從弟視學江右。我昔遇之善。子盍往而謀諸。予曰諾。會黃納言懋徵時以大參董漕南還。請予偕行。予遂與蔡公別。時已秋杪矣。自潞河登舟。舟中客惟會稽魯子學平。與予二人而已。黃公敦友誼。魯子則直諒多聞之友也。皆與予善。次任城。泊舟南池者數日。與魯子登太白酒樓。遊浣筆泉。縱酒論文。忘其沍寒也。至淮陰。乃與黃公魯子別。抵家則迫歲除矣。改歲癸卯。予將治裝爲豫章之遊。請於先大母。母歎曰。汝猶孺子也。蔡

公不知。汝甯不知之耶。從弟宦成矣。而祖若父。喪亦未舉。彼甯不自爲謀。而違爲汝祖若父謀乎哉。予爽然汗下。乃改轅而北。自淮陰渡河。從泰山道上行。孟夏始至。則已四入長安矣。至則以先大母之言告蔡公。公歎曰。善哉母言乎。子姑待之。公自乞歸後。築室郊外。是時好學仙。學士君承權。每休沐下直。輒會賓客。侍公置酒爲樂。予久客公所。無汎交。顏子卓哉客淮舊友也。王子宗夏。吳中雅遊。李子培之。北平大俠也。間一往還。卽屏居一室。蕭然寡營。以是公父子皆信善予。居無何。學士彝初周公以中丞出撫山左。來別公。知予在公所。請與相見。公父子俱言予生平及所以來。且曰。是子非下人者。乃爲親屈也。周公欣然。遂定交焉。時癸卯季夏也。臨行。顏子來送予曰。子四入燕而我不及從子遊西山。此北道主人之恥也。是行也。大事必濟。我有

從弟在齊。今鑒於子矣。三年其待我於濟上。予曰諾。自此予爲齊魯客矣。

瓠史曰。予少聞先王父言。崇禎中赴選人入都觀太學石鼓。旃檀佛像。皆周時物。有唐碑。無宋蹟。又言未得至西山瞻來青宸翰爲遺憾云。及予四入長安。蓋將吊軒轅之臺。灑鼎湖之淚。而獨行踽踽。無可語者。君親道盡。一至於斯。追憶先人之訓。宜乎負恨重泉也。後得顧甯人昌平山水志讀之。恫乎如見遺弓。而聞烏號焉。則予亦可以弗遊也夫。

淮遊

己亥仲秋。予在燕。應蔡襄敏公之聘。自潞河登舟。同載者。都門顏子卓哉。公前治漕時舊客也。行數日。河干有古隴遺樹。土人傳會其說曰。此徐君墓季子掛劍處也。因設像並祀焉。公囑予記之。予援筆而書。

中有云。季子讓國。上符厥祖。而延陵之碑。寂寞無聞。賴有徐君。並存俎豆。一劍之義。重於千乘矣。顏子讀至此。矍然起曰。子必能信友者也。由是大相敬愛。孟冬至淮陰。而秦郵吳叟桐山。周子農父。相繼至。皆公舊客。吳叟年七十。善九章法。知天官家言。性伉直好怒罵。人多畏之。予與之偕。猶猶然也。周子少與無可大師同以才學知名。我師大樽先生及李舒章徐闇公何慤人諸君子皆稱之。至是與予遇。傾蓋如故交。周子好論王伯大略。旁通王乙讖緯之學。顏子家世長安。熟悉官府掌故。相與上下古今。揚挖風雅。晨夕無間。吳叟在座聽之。亦不爲忤也。憶崇禎末。周子與闇公。舒章。慤人同在京師。慤人詣闕上書。薦周子知兵。有詔報聞。周子先南歸。而舒章作詩送之。有云。子爲高堂不得留。我爲高堂不得去。其悲惋若此。史相國開府維揚。辟慤人周

子同參軍事。城陷。愨人死之。周子得免。未幾舒章客死燕邸。而闇公漂泊海外。死生契闊。夫復何云。予每與周子抵掌及此。未嘗不相對霑襟也。淮陰去家數百里。予歲一歸省大母。嘗一視從弟於呂梁。遇周司農於白下。周子時時往還里門。復相聚焉。吳叟以疾辭。豫章張生繼至。蔡公爲人強力警敏。應機立斷。聰於聽受。過耳不忘。遇客有大體。不爲齷齪苛禮。以是得下士聲。居三載。江淮大治。時公年甫及艾。顏子微以止足之義諷公。公慨然太息。自此有投簪之意矣。顏子客淮久。恆動鄉思。間出其家書示予。中皆勸歸語也。至是。公果上書引疾。得請。書旣上。顏子先辭北歸。將別。予舉酒酌之曰。君子哉顏子。世衰道微。懷利相接。人莫不祝其友。躋高位。享厚祿。而爲子者。惟願親有簞金也。今子引公於義。而家乃忘乎利矣。可不謂古君子哉。我賀公

。得良友。且賀子之有詰副也。顏子欣然舉觴而別。時辛丑之季秋也。歲暮送周子歸桐山。臨歧眷眷。不思分袂。蓋遂爲永別矣。明年壬寅春。公始得代。張生辭歸豫章。予從公北行。在燕遊紀中。瓠史曰。予讀漕乘而歎先朝經國之謨弘遠也。襄敏公八年之間。兩董漕政。初當蠱壞之餘。開誠集思。多所釐正。而大指先於恤軍。及其再起。客唯唯視畫諾而已。乃軍習而民亦少紓矣。其大者若定水次。易官兌。吳人至今安之。詩曰民亦勞止。汽可小休。信矣。

按漕政之壞。在順治初年。吳惟華沈文奎二督時。至十二年乙未。敏襄公自江撫遷漕督。承吳沈之後。力反弊政。首議恤軍。行計田起運之法。漕法每船十丁一旗九甲。郡佐僉點衛軍充之。各州縣船若干爲一幫。運弁領之。事皆主旗甲。明季屯政久弛。貧軍多以田典質於民

。僉點時。富軍營脫。貧軍充運行。月糧又不時給。漕督衙門胥吏。陋規甚多。軍每稱貸以應之。及抵水次。橫肆需索。猶不足以償所貸。侵蝕糧米。甚至有虛舟者。填入土石。蓋米其上。過淮時。行賄求免盤驗。以致漕欠日積。公下令僉點運丁。必擇其有田者。家既饒足。糧可無逋。亦免貧軍承運之累。軍皆稱便。再請行派定水次之法。蘇松常鎮四郡。糧多船少。往例派江甯諸衛三十三幫輪運。歲有更易。而淮揚諸衛。亦效尤之。捨近就遠。以濟其私。每年八月初派單赴次。必行賄胥吏。營求善地。是時漕胥豪橫。有趙項毛曹四天王之號。而趙華陽者。專司派單。尤恣甚。軍患苦之。公上疏派定水次。令各衛所就近運糧。江甯各幫派定四郡水次者。不復更易。永著爲令。遂免派單之費。尤稱便。而淮揚間尤有稱不便者。淮安大河尤甚。蓋

二衛率多胥吏親故。每避本鄉而求善地。至是。公以淮地糧少船多。而山東船少。歲常僱募民舟。乃分撥二衛。餘船協運山東。又令每歲南北更番。以均勞逸。二衛以不得遂其私。未免怏怏。而淮揚間縉紳。亦有陰和之者。乘公請急歸。新督亢得時至。將圖變法。會己亥海上之變。亢赴水死。公再起督漕。法乃定。十七年庚子。御史馬公騰陞按部。至松。見松民之困於糧役也。建議請行官收官兌之法。會商於公。公以下問。予力言其便。公遂贊成之。疏上報可。施行至今云。先是我松漕法。縣令僉典富戶爲糧長。收之於民。而兌之於軍。名曰收兌。承斯役者。官吏誅求。運丁勒索。無不破家。民多棄田以避役。地荒賦逋。勢將不支。馬公下採輿議。聽民輸糧官倉。官兌之於軍。使軍民不復相見。民皆大悅。運丁以不得行其勒索也。過淮膚慙。

於公。公斥去之。馬公旋以他事株連坐法。民皆痛之。嗚呼。漕政之壞也。軍民交病。而國受其病。迄於今。軍民交利。而國受其利。豈知我公後先八載之間。救焚拯溺若此其艱哉。故附記於此。以告後之司漕政者。毋惑於浮議。而輕良法也。

齊魯遊

予之遊於齊魯也。蓋六郡皆有馬跡焉。濟南山二而海一。東兗則漕渠所經。南北之孔道也。青登萊居東偏。皆瀕海矣。而中丞開府在濟南。濟南居泰山之陰。綿延起伏。至城南若列屏障。東南高起者曰歷山。北則嵒山華不注也。其川則大清河。北流入海。濟水之下流矣。地多泉。有名者以數十計。大者曰趵突。春秋所謂灤也。宋曾子固齊州二堂紀詳矣。灤泉之穴。自地湧起。可三四尺許。瀦爲方池。流溢交衢。德藩故邸

珍珠諸泉甚甘冽。亦匯爲湖。曰濯纓。以亭臨之。今廢。北有大湖曰大明。上有亭古歷下亭址也。唐李北海杜少陵賦詩處。在城中爲巨浸。元學士李漑之築亭題曰天心水面。今蒙其名云。先朝盛時。湖上竹木翳然。墅館紛布。春花秋月。箎絃雜選。亦有蓮艇漁舫。鳧鴈上下。遙望華不注。遠峯亭亭。秀出雉堞。齊人往往觴客於此。今乃空亭枕河。烟水淼茫而已。自濟南南行入山。踰長清肥城。則泰山境矣。泰安州治在山麓東岳廟。當城中。規制洪敞。漸就頽圯。庭中古柏森挺。尙可摩娑。觀其碑版。皆宋元下物矣。蓋自宋真宗以後。封禪之禮久廢舉。天下奔走禱祀而至者。皆奉碧霞元君。余先在州治中夜望山間。火光蜿蜒若燭龍。自上屬下。終夕不絕。問之曰爲元君供香火者也。詰朝升輿登山。行久之。私怪山中曾無拱把之木。旣見道旁遺燎。及叢枝樵列。云以照

行客。乃知木皆薪之。夜間所睹。卽是物也。宜其爲童山矣。訪五大夫松。指一枯枿。大僅兩握許。後人附會耳。是當薪之也。至三天門乃上盤道。舍輿而步。道殊寬廣。階級平正。左右各列鐵絙。以供攀援。然不甚峻絕。與漢馬弟伯所紀不類。當是唐宋以來。修治馳道。日就如砥也。元君殿在天門內。庭中之銅碑萬歷時中官所立。輔臣祝釐之辭也。殿制微狹。冶鐵爲瓦。以禦大風也。范金以爲像。鐵門封鐫惟謹。以防盜也。中門微啓。以聽瞻禮。阻以鐵欄。士女闐咽。從門外諦窺。手擲施物。以爲幸。或登人肩遙望。擲之輒喜。若道塞不得前。不及覩金像。則叩首歎息而去。甚至有泣下者。愚夫愚婦。上下口誦佛號。與乞丐號呼之聲。喧然應和。至動山谷。尤可姍笑。每歲春秋二時以爲常。予登山時。在九月。累日道塞不得前。賴州守先爲辟人。乃坦行矣。上至青

帝宮。則闕無人也。宮後石壁。刻泰山銘。唐元宗隸書。俗稱磨崖碑。摹搨者架木以登。天寒則爇薪其下。銘之右。卽東封頌。張燕公文。顏魯公書。覓之不可得。先朝有閩人林焯者。官於此。刻忠孝廉節四大字於其上。刊落殆盡。予就壁摩娑點畫之。隙間存一二。吁可怪也。夫此四字何地不可刻。而必於泰山。泰山何處非石。而必刻於是壁。遂使魯公墨妙永絕。千古而下。猶有遺恨焉。余與同行客。向石唾詬。久之乃去。再上至封禪壇。今祀上帝。俗稱玉皇。頂庭中巨石嶙峋。此泰山之巔矣。秦皇無字碑。正當其前。碑形方直。仰視其上。有若蓋者。以手度之。四方適均。石色雜黃白而潤。非泰山石也。予笑語客。彼焯有膽。何不鑿無字爲有字。始皇餘威。猶可懾僮父耶。訪日觀。舊有行館。宿客觀日出。今存廢址。惟見石上纍纍。大小鑿字。大率焯屬耳。野人

薪山者。髡之也。文士鑿山真鯨之矣。聞有黃花洞。及山後奇勝。會薄暮。未及探。遂升輿下山。山輿緯繩於木。乘者如坐舂器中。輿夫革帶垂肩。以手握木。有若御車。其上山也。由舊盤道橫行。如郭索。歸自新盤道。下道險仄。乃雀躍相踵。客每失色。及至平地。足反躊躇。不若橫行之捷矣。泰安在古爲奉高。封禪禮成蠲租賜復。澤至渥也。自元君之祀興。而始有香稅。先朝稅額歲一萬六千金。以六千金供上。其贏皆貯州庫。以備地方城池緩急水旱不時之需。往時四方承平。香火絡繹。稅額之外。常贏數倍。又有擲施錢帛。及冶金銀爲男女形者。充物殿中。春秋二時畢。乃取之。名曰掃殿。掃殿之人。裸體出入。官吏監視惟謹。數復不贖。亦輸州庫。以是州有脂膏名。而大吏之往來齊魯者。亦往往蠶食其中。合州之民。以及四方商賈。朝夕輻輳。莫不曰此元君

賜也。迨先朝之季。兵荒相繼。香火遂稀。而歲額如故。有司不得已而責之逆旅主人。名曰店戶。香客之至也以二時。而有司以期會亟。常先期徵之。輸不及。則曰店戶侵漁也。我知取盈而已。於是有敲扑死者。有縲絏死者。甚至有自縊死者。而歲額又日溢也。以予所見。六年之間。加至三萬金矣。每先一歲。大司農檄下。充給明歲兵餉矣。夫香客者。非若土毛之有籍可稽也。非若關市之貨可取也。四方不知誰何之人。未審其來與否也。而懸徵之且溢徵之。今軍興以來。又不知若何矣。嗚呼。三百年來。無藝之徵。未有如香稅之厲民者也。自泰山南行。渡汝泗。入兗州境。曲阜故魯國。今屬兗郡。先聖墓在焉。是爲孔林。孔林北負岱宗。南面曲阜。汝泗帶其後。洙水襟其前。繚以周垣。中立闕門。門上有樓。登樓前望。曠然平原。遙見東南。隱隱若岡阜者。或曰卽

尼邱也。入闕門折而西行。又北過洙水橋。水今涸。橋北卽墓道矣。夾道皆松檜栝柏之屬。有子貢手植。石人羊馬。制極古樸。饗殿一。其直墓道。爲伯魚墓。右則先聖墓楷也。聖墓前爲子思墓。石碑三。皆元時立。予拜謁畢。心竊疑之。相者曰。先聖墓本乾巽向。伯魚子思。蓋左昭右穆云。聖墓西有小室東向。署曰子貢廬墓處。東有堂南向。云先代帝王臨幸。則駐蹕於此。相傳墓上荆棘不生。烏雀不巢。惟多著草。垣內墓纍纍。自周以來。孔氏子孫。咸叢葬其中。出闕門前有石坊。曰至聖林。左右列柏。直達於曲阜北郭門之外。南郭門內。則先聖廟也。中爲樞星門。東西兩道。各有門。土人稱東華西華。東道上有石坊曰闕里。予從東門入。北折行。入大成門。門內左有先聖手植檜一幹無枝。大不盈拱。肌理堅墨。俗稱鐵樹。中庭有亭。爲拜謁所。旁有石刻曰

杏壇。大成殿規制洪麗。石柱盤龍。先朝正德間重建。先聖袞冕王者服。四配十哲。各如公侯衣冠。左右小石碑各一。先聖司寇燕居二像也。案前列祭器鬯樽一。犧樽一。象樽一。銅光若鑑。五色爛然。鬯尊上有篆文。漢中平年賜孔子廟祭器云。其他尊彝之屬。皆先朝永樂間物也。大成門外中有奎文閣。東西分立漢唐以來碑亭。古碑摹搨。尙有可觀。及詣閣下觀藏書。惟有木石鐫刻雜圖。自禱尼邱。以及端木築室之類。先聖子孫藏書。如斯而已。及覽闕里志。蕪雜不稱。宋自建炎以後。大統攸存。太末一公。例宜並入世系。今志直接金元。削而不敘。一宗之內。自分南北。遂使儒宗下淪外氏。且春秋之法。首嚴內外。若同諸夏之亡。殊乖用變之義。是所望於聖人之後。重加釐正者也。衍聖公第在廟東門外。顏子廟在東北隅。有坊曰陋巷。顏氏子孫。最爲蕃衍。

而廟門頽落。豈陋巷遺風歟。周公廟在邑東門外。今稱文憲王者。宋大中祥符元年封號也。前祀文公。後祀魯羣公。今漸頽廢。公之裔東野氏。世以諸生奉其祀。時中周公往謁。慨然太息。捐金修其廟。復上書請錄東野氏子孫比顏曾孟仲之例。世官以博士。書上留中不報。蓋政府巴泰尼之也。自曲阜趣兗州。可半日許。兗爲洪武間魯藩所封國。崇禎末。城陷。王死社稷。舊邸邱墟。居民寥落。不若東郡完實也。兗郡地大。中貫漕渠。西瀕河東。自鄒嶧諸山綿亘。至於沂蒙。卽青州境矣。泰山爲東嶽。沂山則東鎮也。青在洪武間爲齊藩所封國。永樂時廢。後封衡藩。益都西界曰顏神鎮。接壤萊蕪。山谷綿亘。舊多礦盜。別築小城。青郡倅居之。城隅有泉曰籠水。相傳古有孝婦顏氏文姜。事姑孝。泉生其室。土人神之。立祠祀焉。今水出祠下。其流淙淙。溢而成溪。亦

猶晉祠之水矣。土宜於陶。三齊陶器出焉。入鉛爲棋不及滇。貫珠爲燈不及閩也。羣山夾峙。溪貫其中。山徑旣窮。自高臨下。俗稱青石關。遂入萊蕪境矣。萊蕪古萊人地。春秋公會齊侯於夾谷是也。青萊二城。皆未被兵。城中亦稍完實。北海廟在東萊。國家秩於嶽瀆。則就祭焉。自青萊至在昌邑平度界渡新河。河流入海。土人云。此膠萊河也。昔有建議引漕者是已。自萊至登。遵海行至黃邑以東。岡阜礪礪。萊地多不毛。惟見海水。望洋無際。行旣窮。城郭見焉。東牟真在海角矣。城中居民。不及青萊。婦女服飾。有異齊俗。蓋先朝開府之區。亦有五方雜處矣。城外別築小城曰水城。海水入焉。泊舟於此。城缺其上。以便帆檣出入也。城上列木曰天橋。通人往來。蓬萊閣。其城樓也。廣利王祠在焉。予登樓觀海。復從橋畔下。出城外。城倚山趾。背城面海。有小

菴曰海潮。佛室三。僧寮三。亭一。曰海鏡。宣城施尙白題也。一僧居之。出白石子供客。檻外巨石磷磷。海潮上下。漱嚙不息。聲若吼雷。濺若飛雪。偃仰一榻。可臥而釣也。海外諸島歷歷在望。僧云春夏間海市出沒。大都在諸島間。時當仲秋。子愧不能如蘇文忠禱於廣利王。見而賦詩。又不獲信宿僧舍。觀日月出。誠恨事云。予按登在六郡中。最居東偏。自天啓間有三方布置之議。以營州舊隸東省。而登郡濱海。旅順海道。一帆可達。且東江諸島。遺民無算。遙爲聲援。遂與榆關津門。並開幕府。以中丞節領之。卽登州衛居焉。崇禎初。東江師散。島上之衆。乃復入海。蓋四衛之民。航海來歸。於是僑置其民於登萊二郡。而選其材勇。列諸編裨。以繫營民之心。及我鄉孫中丞元化至。所以撫恤之者尤厚。未幾兵變城陷。中丞自拔歸。就司敗。亂兵據城不下。我

師環而攻之。久之乃拔。則兵已遁出海矣。予詢之登人云。當日大城破。亂兵退入水城。得舟出海去。予觀水城。不及斗大。短垣可踰也。使諸路之師。盡銳并力。先破水城。焚其海艦。彼大城之衆。檻猿籠鳥耳。縱有長鯨。能飛渡耶。計不出此。一旦縱敵。豈非天哉。予是以行至東平。不勝三歎也。當是時。海禁方厲。海濱之民。失其漁鹽之業。重以棲霞之亂。疾疫死亡相繼。登民尤困。周公繪圖上書。請弛海禁。報可。是時甲辰冬。彗星見於南方。明年乙巳春。復見京師地震。齊魯大旱民飢。公復上書言狀。縣官爲蠲是年田租。發帑金六萬兩。倉粟六萬石賑之。齊魯之民。懽然更生矣。蓋兩歲之間。周行六郡者再。嘗以事旁之魏郡。而其他日皆在濟南。公喜賓客。好擘窠書。重書灤源之堂於趵突泉。書天心水面於歷下亭。旣徙幕府於德藩故址。落成。請予題額。

。皆公自署書之。又小築亭榭於濯纓。湖上客至。輒與置酒賦詩。漢上李廷尉文孫偕其嗣君仁熟。枉道過之。流連旬日。賦詩而去。閩人趙叟搆謙。流寓寧陽。年百餘歲。善養生。青州薛叟鳳祚。年七十餘。善天文。皆以禮致之。新安舒奕蕃善畫。龍山王逸菴善書。新安程紫京。龍門劉鳳楚善琴。其他燕齊迂怪之士。謝弗通也。若督亢王濟美。京口談長益。會稽嚴道徽。孫蘭楚。魯晉侯皖山。朱元儀。燕市陳景生。白下毛貞菴。我鄉林平子皆公客。而王談嚴。俱儒宿。公命其嗣履吉師事之。王子尤博學善詩。旁通古文奇王云。諸君子或往或來。或先後至。自癸卯出都。至戊申春。迄公移節嶺南。首尾六載者。予一人而已。先是同公在都。時聞蔡公言。知予有大母年高。居半載而聞大母之訃。予泣請歸葬。臨別公執手語曰。子自齊至吳。屈指往還。三閱月耳。我稔聞

子友顏子名行。且爲子踐濟上之約。予星行歸里。乃舉祖考妣兩世七喪合兆焉。嗚呼大母之命予小子也。自先君沒而有成言矣。垂十年始克襄事。大母已不及見也。是予小子之罪也夫。三月而反命於齊。顏子不至也。亟走使至燕問之。則顏子以訪其從弟客死潼關矣。悲夫。顏子終不鑒於予耶。詩云豈無他人。不如我同姓。此十五國之風也。而望之今日乎哉。周公聞之。喟然曰。子失良友矣。我亦失之。

瓠史曰。自元都燕。以東省爲左輔。蓋京師之吭也。有壯夫者。拊其背而搯之。殆矣。數十年以來。中兵禍至憐也。不與之衽席。而繭絲是問。抑疾其爲逋逃藪也。而網加密焉。有兔爰爰。雉離於羅。焚林而田。將安所逃乎。我視其民。盼盼然。老子曰民不畏死。奈何以死懼之。可不鑒諸。

粵遊

瓠史曰。嗚呼。倡爲遷海之說者誰歟。辛丑予從蔡襄敏公在淮南。執政者遣尙書蘇納海等分詣江。浙。粵。閩。遷瀕海之民於內地。蔡公曰。此北平人方星煥所獻策也。余請其說。公曰。星煥者北平酒家子也。其兄星華少時被虜出關。大凌河之戰。明師敗績。監軍太僕卿張公春被執不屈。太宗遣降將黑雲龍等多方說之。終不從。太宗深敬之。嘆息語諸臣曰。此忠臣也。汝曹當效之。命館之於喇嘛寺中。待以客禮。稱爲張大人。一日。星華偶同公兒入寺。張公舊嘗爲北平監司。星華在家時曾識公貌。遂向公叩首。公詢之。知爲北平兒也。因曰若能待我乎。其主聞之。卽以歸公。公命寺僧薙染之。名曰和尚云。星華固黠。待公左右。稍稍習書計。久之張公卒。太宗以禮葬之。星華歸其主家。從

入關。始與其弟星煥相聚。星華官至漳南太守。星煥從之官。海上兵至。漳城陷。兄弟皆被掠入海。旋縱之歸。其主因問海外情形。星煥乘間進曰。海舶所用釘鐵麻油。神器所用焰硝。以及粟帛之屬。島上所少。皆我瀕海之民闌出貿易。交通接濟。今若盡遷其民入內地。斥爲空壤。畫地爲界。仍厲其禁。犯者坐死。彼島上窮寇。內援旣斷。來無所掠。如嬰兒絕乳。立可餓斃矣。其主深然之。今執政新其說得行也。蓋蔡公之言如此。當是時。諸臣奉命遷海者。江浙稍寬。閩爲嚴。粵尤甚。大較以去海遠近爲度。初立界。猶以爲近也。再遠之。又再遠之。凡三遷。而界始定。墮縣衛城郭。以數十計。居民限日遷入。踰期者以軍法從事。盡燔廬舍。民間積聚器物重不能致者。悉縱火焚之。乃著爲令。凡出界者罪至死。地方官知情者罪如之。其失於覺察者。坐罪有差。功令

旣嚴。奉行恐後。於是四省瀕海之民。老弱轉死於溝壑。少壯流離於四方者。不知幾億萬人矣。嗚呼。不仁哉。執政者方忻然以爲得計也。驟遷星煥官至山左監司。一夕嘔血死。而是時太僕張公子。詣闕上書。請出關遷其父喪。歸葬同州。詔許之。予時在山左。因與周公述蔡公前語。相與嘆息善惡之報果何如哉。星煥旣死。海上之出沒縱橫自若也。執政者久而悟其說之誕也。遂有開界之令焉。嶺南之遊。實與開界相首尾。故先著其概於篇端。予以戊申二月。自歷下辭周公南歸。遂訂嶺南之遊。憶自乙巳去家已四載矣。五月公南來。予偕林子平子孫子錫黃追及於蕪湖。七月抵豫章。道聞朝議有遣使開界之命。公色喜曰。八年民命。其少蘇乎。八月度庾嶺抵端州受命。則聞朝使已先期至羊城矣。公馳赴之。朝使都統完顏特進。副都統吳申巴圖魯。并侍郎雷虎三人皆善人。

。而虎尤清介。公與議曰。朝廷恤民疾苦。德意甚盛。粵東濱海七郡。地方遼闊。萬姓喁喁。望恩如望歲。若必周行七郡。而後上疏使遷民復業。則來年春耕誤矣。今我儕馬跡所至。當宣布朝廷德意。卽令遷民出界。及時開墾。給以牛種。蠲其租賦。早一日。則民受一日之惠也。使者曰善。於是從惠州始。從界外行至潮州。東抵分水關閩界而還。所至民皆扶老攜幼。張樂焚香。歡聲動地。其還也亦如之。則有負耒而拜者矣。以予所覩。界外所棄。若縣若衛所城郭故址。斷垣遺礎。鬻骸枯骨。隱現草間。粵俗鄉村曰墟。惟存瓦礫。鹽場曰漏。化爲沮洳。水絕橋梁。深厲淺揭。行者病之。其山皆叢莽黑菁。豺虎伏焉。田多膏腴。溝塍久廢。一望汗萊。良可惜也。向所謂界者。掘地爲溝。廣不盈丈。插竹引繩以表之。或遇山則繞山址爲溝。曰。此界外山也。亦有去城不里

許爲界者。民間畏同陷阱。側足不前。而愚懵無知。往往誤入其中。是時所司。尙有以出界坐辟爰書請者。皆貧嫠村豎。往拾蚌蛤之屬。爲吏所掩獲者。命出之。所司持之曰。此未開界前犯也。公曰。今界已開矣。立命出之。因嘆八年之間。冤獄殆不可勝數矣。若乃奸人。身負大戮。走死地如驚。掉臂公行。吏熟視。不敢出捕。久而羣不逞之徒。窟穴其中。入界鼠竊。或駕小舫。出沒島嶼。勾引海舶。交通彌甚。郡邑諱之。予在潮語周公當備之。旣而潮帥遣兵。出界除道。果遇盜艘格鬪。互有殺傷。乃陳兵以行。盜始斂跡。嗟乎。向之設界以防盜者。適所以藪盜也。十月惠潮事竣。歸途公忽聞尊人之訃。哀毀謝事。兩上書請奔喪。而朝使敦趨公出。公堅執前志。予曰。詩有之。王事靡盬。不遑將父。今日之謂矣。使者在門。王程有期。請勉竣事。而伸前請可乎。公始

強起。自高涼至雷陽。見珠崖孤懸海外。使者望洋而不敢渡。乃至合浦西抵欽州交趾界而還。一如惠潮成事。在道果聞命不允公前請。公向予潛然曰。奪情非禮也。君命之。我何以爲子矣。己酉春。再赴羊城。東自東莞。西至香山。廣界畢開。於是與使者公議上疏。請修築界外廢縣。衛所城堡。設官如舊。革饒平土鎮。建立大鎮於碣石衛。沿海各汛。分設偏裨。捐資營造成兵廬舍。旌旗壁壘。煥然一新。疏上報可。九月使者返命。蓋首尾一載。而開界之事始竣。是役也。四省同時奉命。而粵民獨先一歲復業者。則公之力也。乃公猶悒悒不自得。蓋嶺南去京師遠。法令久弛。平南王尙可喜暮年驕恣。諸子多不法。往時督撫選懦。事多掣肘。公以剛方自持。不少爲之下。文移一遵典制。大拂其意。以書相詰。公引六部宗人府文移之制答之。時朝使至。問外藩相見之儀。

公曰。春秋王人序於諸侯之上。况公等大臣乎。遂具賓主之禮。雖內積不平。然以公持大體。不能難也。因以女請婚。公力辭之。齟齬之意。時形於色。造作蜚語。欲相傾。惟開界之役。朝使咸推重公。故得行其志。而所棄海外大洲尙多。皆民間恆產。使者以越海尼之。公以爲遺憾云。粵西孫延齡。故孔氏壻也。統兵駐桂林。所行多不法。公深疾之。而恨未能除也。嘗慨然嘆曰。我平生慕韓襄毅之爲人。今王事告成。行將歸矣。不及觀斷籐峽也。會粵西撫軍。以公事請會於梧州。梧故襄毅開府地。公遂以十月赴梧。襄毅故府久廢。卽其遺址。葺爲傳舍。居五日而返端州。公復上書乞歸守制。謂予曰。幸上憐而許之。今而後。我可以爲子矣。予因進曰。度公此奏必得請。僕亦有犬馬疾。請爲先驅。至吳。待公於江上。公許之。公素好賓客。嶺南之遊。故人畢至。而

雜賓亦稍稍進。陳景生。王濟美。先後引去。林子平子謝病歸。未度嶺而卒。聞之悲感。忽忽動鄉思。公雅知予意。不强止也。十一月。予辭公歸。登舟疾作。過曹溪不能登。臘月朔。度嶺。望後過彭蠡。憶癸巳出閩。此行往返。凡三過廬山。皆以風駛不及遊。爲生平恨事云。庚戌正月晦日抵家。知周公已得請終制矣。是夏。蔡公出督楚蜀。遣使招林子安國及余。林子者。平子伯兄也。予語林子曰。我與周公有成言矣。子其行乎。九月。予赴白下。周公自粵至。悲喜交集曰。子信人也。盤桓旬日。依依不忍別。送公渡江。乃入楚。

予記粵遊而重有感於周公之事也。公撫東六載。丁未大計。京朝官三品以上及督撫諸臣。皆自陳廷。推公治行才望第一。有詔褒美。旣而有粵督之命。蓋出自上意云。公旣拜命。上書請陞見。顧問殷勤。燕賚稠渥。

。舉朝榮之。督撫諸臣之陞見。自公始也。公在粵未幾。旋以父喪乞歸。公歸之明年。廷臣有以督撫諸臣營治宮室爲言者。公亦與焉。有詔詰問。衆皆唯唯。公不勝其憤。抗言廷辯。言者獲重譴。公亦罷官。家居且三載。而吳三桂反。滇黔楚蜀。相繼告變。詔卽家起公司馬兼御史中丞如故。帥兵入秦。公受命。單騎就道。旣抵秦。川人皆言蜀道難。當俟大兵同進。公奮然先驅。度雲棧直抵葭萌。寇登山攻圍甚急。公晝夜登陴。中矢負傷。力戰却之。飛羽請濟師。乘勢進取閬中。而後軍逗遛不進。同事者復相齟齬。久之轉餉不繼。士卒告飢。公以孤軍深入爲慮。上書言狀。詔撤兵回秦。兵旣旋而蜀寇果大集。出棧道。陷漢中。臨渭水。而諸軍將士皆曰。微公先幾。全軍覆矣。旣而經略莫洛。遣大帥王輔臣入蜀。輔臣亦以轉餉爲言。洛不應。強之行。衆兵大譟。立殺洛

擁輔臣歸平涼。隴西告警。三秦大震。於是上命大將軍圖海馳赴秦。與公會師度隴撫之。輔臣降。海素愛重公。相倚如左右手。用兵機宜。一以諮公。公感知己。殫智推誠。言無不聽。平涼之役。公力居多焉。公雖爲蜀督。奉命駐秦。秦中郡邑被陷者。公皆帥兵往平之。每戰必身先士卒。諸帥或諫曰。此非大臣事也。公雅自喜不能止也。先後所上戰功甚多。司勳報聞而已。當是時。闔外用兵。事多中制。外臣皆樹內援。而公獨孤立行一意。性慷慨好論列。觸事感憤。或語侵同列。至上書刺及政府。人多危之。惟海以爲忠。海嘗因入奏便宜。從容進曰。方今文武。才無如周有德者。會滇黔久不下。上心識海前語。特命公移督滇黔軍。公喜受上知。馳赴武陵。見諸路兵雲集。羣帥無所統轄。卽上書請設經略。公之督滇黔也。旣非政府意。書上。益不悅。乃請以

楚督蔡公爲將軍。統諸路兵如經略。公大失望。鬱鬱不樂。發病卒。年五十。時庚申正月也。悲夫。公膺專征之任。不可謂不重矣。受特達之知。不可謂不深矣。功業垂成。時會不偶。蜀節甫去。而蠶叢之道通。星隕未幾。而檠瓠之師潰。英雄氣盡。封侯數奇。豈非天哉。豈非天哉。初滇南叛。閩粵東西羣應之。而可喜老奸。且前且却。未幾病死。孽子三十餘人。自相蹄嚙。及滇南平。可喜羣妾上書。盡發其逆謀。詔遣使駢斬於廣州市。盡室北遷。粵民大悅。是時粵西孫延齡。先爲三桂所殺。閩粵相繼誅夷。東牟三叛。一時並殄。天下知公在粵時事者。始敬公之遠識。而惜其不及見也。公天姿磊落。氣度豁如。樂易無城府。而識鑒英敏過絕於人。果達而藝。智略輻輳。博綜羣籍。旁通重譯。以至小學曲藝。一見輒窮其奧。居恆好與客論王伯大略。古今成敗之事。

在秦時。延訪宿儒李因篤輩。羅致幕府。每出師必載書史數百卷以行。軍需少暇。則對案讀書。至夜分不寐。或相與賦詩爲樂。詩成縱筆疾書。書益進。三秦名士。聞風景附。而公益傾身下士。一言之合。推轂若不及。或有細過。亟掩覆之。惟恐傷其意。以是一時賢豪。咸樂與公爲布衣交。而名位相軋者。心弗喜也。蓋公傲於權勢。而謙於寒賤。中秉亢直。而意存長厚。其天性然也。嘗曰。言人之不善者。必非善人也。又謂余曰。士有諍友。我得之子矣。嗟乎。予何以得此於公哉。予自癸卯定交。迄於庚申。先後十有八載。朝夕左右。僅八載耳。後此十載。皆公戎馬患難之日也。日月不居。予已冉冉老矣。未得周旋患難。追隨戎馬。而公殷勤寄問。曾無虛歲。予遣兒慰公。北至燕邸。西至岐陽。公握手勞苦如平生。惟聞予自洛陽歸。得瞽眩疾。咨嗟久之。手書慰藉

有加。以爲相見有日也。而何意白門江上成永別耶。嗚呼。虞仲翔有言。天下有一人知己。可以無恨。攬筆至此。不自知其涕之何從矣。因記嶺南之遊。而終及之。後之覽者。悲周公之志。亦重悲予之志也夫。

楚遊

予之交於蔡襄敏公父子也。燕淮遊紀具矣。客山左六載。音問無虛歲。旣而林子安國遊燕。客蔡長公所。長公由學士累遷至少宰。奉使入閩。林子從之。時予在粵。復從嶺外。郵書相問。庚戌春。予自粵歸。則林子亦自閩返里矣。長公旣拜楚蜀之命。襄敏公命之曰。我生平宦遊。一至豫章。再至淮南。從我遊者。若周子農夫。顏子卓哉輩。俱已凋謝。今惟有王子耳。汝當致之。我知之深。必不負汝。公曰敬諾。是時張子子退亦遊燕。公知爲予友也。共載而南。予別周公於江上。以仲冬抵荆

州。則張林二子皆在焉。同舍客皖山良弼劉君舊黃門也。他若張生。豫章故吏也。楊生。故豫章掾。襄敏活之。隸畜之。令其侍書者也。惟予三人爲同里故交。少相愛重。而張子飄零湖海。羈棲南北。契闊且二十餘年。至是始得相聚。懽踰平生。酒酣道故。繼以歌泣。常至申旦不寐。旁人或竊怪之矣。公性孝。少爲京朝官。未習外事。及至楚。一以父政。父臣爲志。每有措置。常左右顧詢。我翁時若何。左右隨事迎合。以順適其意。張生果而窒。自伐其能。楊生陰而伎。好爲非禮之禮。亦欲與聞政事。而其故時監奴。怙勢日倨。通謁受賄。有異淮南時矣。遼人王某。故從襄敏公在豫章。司軍中旗鼓。旣罷。閒居維揚。嘗委之市鹽。恣爲奸利。乾沒貲十餘萬。監奴夙與爲錢交。至是舉以司軍府出入。或曰。是不嘗負主耶。奴曰固也。不爾。何以償主責。公曰我家臣也。亦委心

焉。楊生從而和之。由是內外應如桴鼓。而所難者乃在客矣。公寡言笑。對客默坐至移時。不發一語。客莫測其指也。恆以此自多。或有談言微中者。輒不懌。奴輩從旁伺顏色探得之。因持客短長。漸欲去其異己者。雖予以父客見禮。素患卞急好盡言。而張子亦遇事發舒無所避。以是有間之者。公意已移。而予不知也。歲除公有入蜀之命。林子以蜀道難。猶豫未決。監奴忽奉幣而出。以公命致張林二子。辭曰餽贖。予相顧愕然。二子曰。敬聞命矣。越三日。而張子北行林子東還矣。時辛丑正月之四日也。予送別二子。悲不自勝。旁人皆爲之感動。退而見公。默坐自若也。予且悲且憤曰。是不可留矣。反側竟夕。旣而自念曰。我之來也。若翁之命也。彼在京師。三千里外。安知荆南兩月間情形哉。我去之。彼將曰王子負我。我白之。何以處人父子間矣。乃不得已而入

蜀。行五日至夷陵。吳西陵也。州西爲南津口。始入峽。舟至青灘。易蜀舟。上有葉灘二。灘水勢險激。諺云有青無葉。有葉無青。言相爲消長也。蜀舟大者。橈夫十餘人。左右分列。遡流而上。客子促膝舟尾。僅如斗大。遇灘。則舍橈而纜。纜以巨竹。四分之。首尾啣接。以麻固之。長數十丈。伸若引繩。收則蛇蟠所謂百丈也。舟子牽纜登山。從亂石中崎嶇上下。高或至嶺。降或臨水。累足側步。勢殊危仄。纜阻石則絕。一人從後謹護之。纜絕失足。往往有墮崖死者。舟中鳴鼓。牽纜行者。不暇回視。惟聞鼓聲緩急爲節。灘高則鼓急。過灘鼓止。收纜而下。復鼓橈矣。次歸州。州治在山內。古秭歸也。次巴東。是爲楚塞之徼矣。次巫山。故瞿唐峽。峽前爲灩澦石。北岸卽白帝城故址也。計行峽中凡八日云。三峽之勝。酈道元水經注詳矣。茲不復述。按三峽七百餘

里。水經江水又東。逕廣谿峽注云。斯乃三峽之首也。峽中有瞿唐灘。今瞿唐峽是也。一爲巫峽。或曰仙山峽。巫山幽鬱。神理茫昧。殆上真所棲。故山得仙稱矣。其間首尾一百六十里。所謂巴東三峽。巫峽長者也。一爲明月峽。在西陵境內。或曰統名西陵峽。三峽之名。斯爲正矣。若以西陵明月黃牛爲楚三峽。巫歸瞿唐爲蜀三峽者枝矣。其地指畫形似。傳會標目。厥名非一。大都長年土人之談。不足信也。白帝城以西爲夔州。古夔子國也。自夔府而上。爲雲陽。萬縣。忠州。酆都。涪州。長壽。凡十八日而抵重慶。古渝州也。石城巖嶺。天然設險。岷江嘉陵二水束之。會於城下。東下夔門。佛陀二郎兩關握其西。自渝以西。叢山荒邑。伐木除道。皆曩時虎穴。不敢宵征。山麋特壯。奔突道左。蟻巢於樹。累土成盜。蜂房如傘。下垂及地。目所未經。靡得而詳矣。

。經永川。榮昌。隆昌。內江觀鹽井。井以石架木。引竹汲水煮鹽。旁有廢井。乃獻賊所塞。他邑廢井甚多。修復者十未及一。問火井。聞在富順云。又經資縣資陽至簡州之龍泉驛。始下山。凡十有二日。而至成都。時則仲春之杪矣。予自經登舟。意忽忽不樂。至渝。舍舟乘輿。體益憊懣不能食。至成都而疾大作。兩月疾始愈。醫者云。水土不宜。予心知其非也。蜀中風土甚佳。仲春山行。雜花競發。綠梅成陰。鳴蜩嘒嘒。已類初夏。蓋地偏西南。天時早煖。宜產荔枝之屬矣。成都三伏時。夜雨晝晴。頗滌煩熯。因憶杜少陵詩云。蜀天多夜雨。江檻每朝晴。信實錄也。成都自獻賊之亂。官民廬舍。劫火一空。蔡公至。館於棘園。卽蜀王故宮也。規制略如大內而差陋。惟存重城。館舍皆草創。蜀人云崇禎甲申八月初九日。賊破成都。蜀王同妃。投西宮門外井中。今井

尙存焉。國君死社稷。無愧於三月十九日之烈矣。同時殉難者。成都太守太倉沈公雲祚。他郡則巴縣令南昌王公錫二人而已。秋日偶出遊。西望羣山。日光雪色。皎然奪目。出南門登萬里橋。又憶少陵西山積雪。南浦清江之句。不勝涕泪一身之感。西至昭烈惠陵。荒土一坏。陵左舊有諸葛武侯祠。已廢。有唐柳公綽碑。訪浣花溪。百花潭。潭在草堂寺前西。爲少陵草堂遺址。惟存荒祠。斷碑而已。又至青羊宮。樓觀煥然。時賢所重構也。登樓四望。遠山環繞。若屏障。中間平泉如掌。所謂沃野千里也。阡陌宛然。溪流清駛。人烟久絕。盡成汙萊。山麋野豕。交跡其中。野外高邱纍纍。則皆獻賊屠戮之暴骨。聚而瘞之。三十年來尙未能盡也。城中茅舍寥寥。詢其居民。大都秦人矣。公乃議爲生聚之計。上書請招民入蜀者。得除爲吏。又請還蜀士之流寓四方者。爲四民

倡。事皆施行。又下令禁止昭烈陵樵採。命所司重建諸葛祠。少陵草堂。時瀘州亦修諸葛祠。白帝城修昭烈祠。皆爲立碑焉。公拊循將士有惠愛。而於降將尤加意。荆南麾下。舊有施州降將部曲。令入蜀。每日畢集幕下。席地列坐。會食具酪茗。談諧盡歡。羅拜而退。日以爲常。或較射角勝。置牛酒。降將常搃腕妄詡戰功。公亦妄聽之。不責其誕也。在蜀半載。客有言彼土山川諸奇者。公欣然欲往。聞青城道蕘不可行。乃謀歸途。爲峨眉之遊。且將爲親祝釐也。八月下澣。出成都渡江。岷江至此。其流尙狹。淺厲深揭。公策馬亂流而濟。水及馬腹。水行者以筏。下嘉州焉。經雙流廢縣爲新津。彭山至眉州。州治荒蕪。三蘇祠尙存木假山堂。過夾江至峨眉縣。初未至縣。望見一山。高出雲表。衆指之曰此峨眉也。高六十餘里。蜀有三峨。是爲大峨矣。翌日入山。飯於

伏虎寺。天微雨。過華嚴廢寺。渡雙飛橋。二水合流而下。黑白分明。中有石如牛心。過此始一色矣。至功德林。楠木數百章。蔭映如。蓋舊有菴已廢。薄暮宿萬年寺。卽古白水院。院僧紫芝。天童法嗣。破山弟子。募修大峨樓。公以千金施之。自縣至寺。策馬上下。已煩登頓。不知尙在山麓也。詰朝舍騎而輿。前後設機。上下適平。八人舁之。數人掖之。二人負纜先之。衆力更番。其行殊疾。我輩籃輿略如閩粵。二人舁之。五六人掖之。從寺左緣磴級拾級而上。達觀心坡。爲初殿爲化成廢寺。俗名木皮殿。蓋山高徑險。陶瓦重不易致。且風勁雪深。易於飄裂。乃剝木爲之。其脩尋丈。一覆一仰。山中僧舍皆然。微獨化成也。最上則易陶而冶矣。抵雷洞坪。坐石上。觀白雲起。洞中淳然上蒸。咫尺之間。如隔步障。道旁有禁聲碑云。洞有龍。聞人聲則雷起。方相顧

屏息。忽有僮奴大噪而至。坐者皆驚。亦了無異也。山徑斗峻。輿夫初舉步。兩足縮縮。既而頂踵相接。氣息不屬。余每遇平處。輒休憩之。因問汝曹山中人。何乃爾耶。答云民輩從未嘗登此山也。以力役來耳。乃述先朝盛時。直指者歲一登山。邑令選徒夫爲御。而山僧佐之。二十年以來。遊履絕矣。子遺無幾。山寺無僧。是役也。自肩輿而外。負荷供億役至數百人。民輩力不任。敢不趨事。指道旁負木罌者曰此水也。山井水寒。恐不中貴人飲耳。予聞之。蹙然不忍升輿也。而足弱不勝步。屢升屢憩而已。或忽平如脊。私意其夷也。愈前愈狹。僅通輿行。旁皆絕壑。目臨神悸。或木梁如砥。復步過之。則棧閣也。下窺無際。重爲股栗。自雷洞坪以上。爲八十四盤。尤稱險絕。初以爲輿可掖也。及遇險仄。掖者不得前。則以手握輿。腕力竭矣。又上則坐不得安。身如倒植。

。舍輿而步。輿夫握以升。魚貫猿引。亂石磊砢。石絕架木而度。叢林
。膠雜。古藤回互。蛇懸蚓結。蔽虧日月。雲霧間之。石蘚溽潤。舉趾輒
。躓。足力竭矣。既躓復起。以手據地。不擇燥濕。得石卽止。仰睇林杪
。鳥道蜿蜒。前行纍纍。若蝟緣木。後者繼至。勢不得休。匍匐強進。
且前且却。至是而手足力並竭矣。抵太子坪。梵宇稍整。憩久之。乃上
。天門石。右爲寺。石從左環其後。左爲門。廣僅容輿。兩壁峭立。委折
。若曲巷。石紋黝潤類太湖。入門皆坦道矣。過娑羅坪。將登巔。忽聞傳
。呼曰。佛光見。疾馳而上至光相臺。倚闌平視。光如大圓鏡。四圍雲成
。五綵。時余登臺稍遲。佇立未幾。光影倏散。化爲紫雲。橫亘天半。須
。臾白雲浪湧。浩然瀰漫。僧家謂之兜羅繇。俗名銀海焉。公見之大喜。
。既而雲氣驟散。碧天湛然。下視山川城郭。歷歷在目。遙望天外。二山

隱見。或云此越嶲瓦屋山。及西域雪山也。是夜宿經閣。夜未半。又聞傳呼云。聖燈見。亟披衣起。復登臺觀之。燈光如燭。參差明滅。若遠若近。山僧獻訣云。登山者求觀佛光聖燈。或待至累日僅一遇之。或值陰霧。至經月卒不得覩。今日光燈並見。稀有上瑞也。公益喜。以余度之。高山日上雲下。光景相射。時當秋霽。變幻澄鮮。理或有之。僧神其說耳。臺上二鳥。類鵠鵒。馴擾不去。名佛光鳥。俗言光見則鳴。殊不聞也。聖燈疑有青燐之屬。相傳時或近人。攬之乃是落葉。聞五臺亦有之矣。質明。九月朔。公命僧作佛事。予進曰。公爲親祝釐。吉祥善事也。而從者佩刀負矢。趨蹌左右。恐非所以對越慈氏也。盍釋諸。公許之。予登臺入殿。禮普賢大士。宿霧空濛。上下一色。遙見霧中冠佩數輩。森然齊列。心怪之。乃公所從麾下降將也。余竊嘆曰。是遊侶也。

耶。而罷民力以昇之登山者也。象王其不忍見乎。殿大小凡四。皆奉普賢大士。殿瓦皆冶銅鐵錫爲之。先朝藩藩岷藩。銅碑各一。經閣亦鐵瓦。先朝季年重脩。梁上載年號。及舊鎮邗三昇題名。中梁懸毗盧佛像一。亦三昇施也。山中所過僧院。名不悉記。聞山後僧舍尙多。以足疲不能遍遊。惟偃息閣上終日而已。僧言冬初雪降。山徑不通。謂之封山。至明年初夏始開。不耐寒者。季秋皆下。其住山者。豫聚半載糧。淪雪而飲。其苦行若此。是日陰雲。夜有寒色。曉起僧已煨火以待矣。從雲霧中下山。衣皆沾濡。旣而雨至。扶攜崎嶇。困虺彌甚。至萬年寺。舉步失次。且僵臥僧榻。公已先驅。往遊洪椿坪。遣人趣予行。予足不能前。而僕夫皆告痛矣。遂留宿寺中。明晨至雙飛橋。公亦自洪椿坪至。極言山刹之勝。惜不及從也。至伏虎寺。復易輿而騎。歸宿縣邸。明日

次嘉定。乃登舟。岷江至嘉州始大。大渡河水來會之。蜀舟皆集焉。一都會也。州治被兵未殘。廬舍完整。爲僅見云。舟次犍爲敘州。馬湖水來會之。或曰岷江一脈入滇。出金沙江流入馬湖。未詳也。次南溪。江安。納溪。瀘州。自蜀入滇黔之孔道也。內江水自資簡來會之。次合江。江津重慶。嘉陵江水來會之。次涪州。黔江。合南夷諸水來會之。次萬縣。開江水自開遠來會之。總於夔門以入峽。自夔門下峽。計五日而抵荊州。時則九月之晦也。往還凡歷三時云。道元云朝發白帝。暮宿江陵。蜀人言盛夏水暴漲時或有之。然人畏不敢下。謂之封峽。冬春水縮。舟行差易。惟遇旋渦。上下爲之戒心。時乘巨艦。左右二楫。榜人二十餘輩。搖曳震聒。不辨人聲。忽爾寂然。視之。則舟如蓬轉矣。過青葉二灘。不復易舟。水勢懸溜。自上而下。舟中人皆失色回望。羣舟如飛。

鳶。站站墮水也。孟冬過黃牛峽時。登黃陵廟。穿石覓徑。良久達岸。至是。舟與岸齊。前石皆在水底矣。益信蜀道難行者。當在冬春之際也。還荆南旬日。而劉君辭歸。君年少於余。先朝嘗爲庶常。易代以後。給事黃門。失職家居。流寓白下。長齋事佛。禮北斗志極精進。道遇緇衣。依依如宿契。慕釋氏苦行。頰首嚙伍。嘗長跽。請禁屠牛。又請檄下學宮。爲宣聖誕日行禮。其志尙若此。公亦以孟季之間待之而已。臨別贈言。不勝三嘆焉。憶同遊荆南者。江左四人。張林二子。先期賦別。劉君入蜀。相繼還山。惟予老病。塊然索居。楚辭所謂寥落兮羈旅。而無友生者也。先是在蜀得張子都下書。知己南還。及歲暮。則聞林子又入都矣。

壬子仲春。林子至自都門。欣慨交集。聞張子復有汀南之遊。不勝聚散

之感焉。孟冬山陰徐子野公至。徐子善樂府。力學好古。手錄羣籍。累百十卷。傾蓋如故。喜得良友矣。歲在癸丑暮春之初。與徐子遊武昌。登黃鶴樓而還。未幾公有湖南之役。予謂徐子曰。可以登南岳矣。自荆南涉江。抵岳陽。樓已毀。倚舷遠眺洞庭茫茫。君山隱見。憶太白明湖玉鏡之句。爲神似矣。至湘陰泝湘水過長沙至衡山縣。是爲南嶽。週迴八百里。迴鴈爲首。嶽麓爲足。而嶽神之祠。則在縣。自縣三十里至嶽市。平岡疊阜。闔關蜿蜒。馳道寬衍。往時磬石如砥。列植喬松。暑不張蓋。行者安之。今石皆傾圮。松刈爲薪矣。岳廟規制崇廣。過于岱宗。殿爲亂兵所焚。有司卽嘉應門奉岳神以時致祀焉。庭中洪武時穹碑巋然。鐵香爐一。崇禎間桂藩物也。廟值朱明峯下。流水爲渠。相傳元人所鑿。又於殿後立黑帝廟。若爲厭勝之術者。而赤帝子卒應朱鳥之祥。

方術之言。不足信矣。今廟尙存。自岳廟而西北折入山。籃輿安步。客無倦色。十五里至半山亭。過丹霞。湘南二廢寺。又十五里。登祝融峯。予與徐子列坐石上。日沒月出。天宇沈寥。七十二峯。皆在趾下。湘流如折。隱見空外。觀止矣。良久。至望日臺觀岫嶺碑。公已乘月遊青玉壇。客不及從。返宿上封寺。是日爲四月初八日。佛火黯淡。僧廚蕭然。殿宇頽圯。地尤蒸濕。蓋雲霧所出入也。僧言寺有田爲他寺所侵。緇徒寥落。不能自存。問及南臺福巖諸名刹。亦俱廢。又言南天門下。有石船。辛卯春一夕大雷雨。忽失所在。陵谷易位。若或有之。山刹廢興。無論矣。予夙聞方廣之勝。言於公。詰朝將往遊焉。早起雲氣入室。衣襟沾濡。衝雲而下。至下方。則雨矣。次勝業寺問方廣道。從者以雨疑之。公決策行。初行田間。涉澗踰嶺。崖谷陰森。松杉蔽虧。升降

窅然。中道雨大作。憩須彌廢寺。雨止復行。山皆梯田。泉左右。阡陌之遠者。引竹過山如蛇行。至不可田則石。石磊砢。無倫次。巨者如屋。泉則怒飛。溢爲大壑。不可厲揭。伐石爲梁。兩崖夾之。泉益壯激。雲樹蒙茸。人行其中。形影相接。笑語莫辨。如是者累百折。復度嶺。嶺斗下。羣峯忽合。旣合復開。方廣寺峙其中。宛若蓮萼。寺燬於火。門廡不設。僧茸茅以居。前臨流泉。踰橋升階。像設略具。二賢祠在寺右。中祀朱元晦張敬夫二先生。左配以林擇之用中同遊也。右配以尹洞山臺建寺者也。公具牢醴祀焉。問湛文簡嘉會堂額。羅文恭詩壁。僧荒僧無知者。出寺觀惠汝尊者洗衲泉。補衲石。旁通一徑。時有行者。僧云。是走湘潭道也。昔朱張二先生循是入山。遊方廣。以歷高臺。福岩大名。諸刹。達於上封。今山中道弗可行矣。宿僧舍。泉聲雨聲。淙

淙竟夕。明旦下山。過黃庭觀。觀魏夫人飛昇石。止九仙觀小憩。庭中有平石。曰。九仙飛昇之壇。劉坊朱陵洞。會薄暮不果。南岳之遊。予有意訪求先賢名蹟。爲復興地。而公以于役遄歸。不及行。惟命有司。葺岫樓石室。歸上封侵田。重書嘉會堂額。爲文立石。一置上封。一置方廣焉。浮湘下長沙。訪岳麓書院。規制略如學宮而陋。李北海岳麓碑。在麓下。甚完好。循麓而上。中道有小石幢。隋文帝立。入岳麓寺。殿宇荒落。一僧蹣跚。蕭然四壁。壁間書杜少陵詩。詠嘆久之。左有閣。時賢所建也。置禾本藏經。其中一僧檢藏焉。俯視湘江。近在襟帶。懷屈賈之遺風。予與徐子有同志矣。下湘陰。出洞庭。茫無畔岸。一舟先之。夜宿茭蘆間。行湖中者四日。過沅江至龍潭陽。是爲沅水。泝流而上至武陵而還。乃由安鄉。澧州。公安。渡江歸荆南。是役也。自洞

庭之東涘以達衡。自洞庭之西涘以歸。時已仲夏矣。乃泝漢水而上。過安陸。楚郢中。先朝承天也。至襄陽。泊舟峴山下。觀羊叔子祠。騎行渡漢。過樊城。抵穀城。遂爲武當之遊。水經注云。武當山一名太和山。亦曰案上山。山形特秀。又曰仙室。荊州圖副記曰。峯首狀博山香爐。亭亭遠出。藥石延年者萃焉。晉歷陽謝允舍羅邑宰隱遯斯山。故亦曰謝羅山。傳記云。一名太岳。七十二福地之一。非真武不足以當之。因名武當。真武者。北方元武之神也。而道家神之曰。北極佑聖真君。先朝洪武間。列在祀典。永樂靖難。尊號元天上帝。名武當。爲太岳太和山。發帑金數十萬。遣隆平侯張信駙馬都尉沐昕等董率軍夫二十餘萬人。創建宮觀三十有六。十二年乃成。在山中曰太和。曰南巖。曰紫霄。曰五龍。在山麓曰玉虛。曰遇真。在均州曰淨樂。其他小宮觀。分領

於七宮。成化間。以中官言。改迎恩觀爲宮。統稱八宮云。嘉靖間。復發帑金十萬。遣侍郎陸杰董工脩葺。三年始竣。蓋先後所糜縣官金錢不貲。而歲供香火月給衣廩之屬。以時取之民賦。特遣中官專司其事。有司不得與。四方之人聞風奔趨。捐輸金帛。日以益衆。乃權稅以代民賦。而羣蠹蠶食其中。不可勝計矣。隆萬以後。諸藩邸爭於山下各建茶菴。若周。若晉。若楚。若襄。若慶。若潞。若瑞。凡七。今潞瑞皆廢。餘僅有存者。惟周菴規制最壯。道士新加脩葺。猶奉前王遺像焉。止宿周庵。厥明登山。當馳道石坊。曰治世元岳。嘉靖時所建也。次遇真宮。永樂爲張三丰真人建。相傳元季真人。結茆於此。曰。此地當興。因卽其地爲宮。立像左廡。天順間。贈通微顯化真人銅碑一。道士出銅笠半規示客曰。亦先朝賜物也。入仙關。次復真觀小憩。道人上黨王昆陽

。白雲戒師也。丰姿修偉。自言年八十餘。善導引之術。弟子甚衆。忽聞鄉音。叩之。則同邑俞姓。言尙有邑人趙氏兄弟同學。一在太和。一在瓊臺云。自入仙關。馳道廣斥。升降咸宜。層巒列岫。左右縈迴。山無童阜。林無寒柯。雲日所發。景出象外。私疑稍畜於泉。及至龍泉觀。喜得泉矣。踰橋沿澗。懸崖峭嶠。谿壑瑰異。紆折久之。巍然雄峙者。紫霄宮也。宮南向臨池。地勢特尊。殿後絕壑爲展旗峯。前列三公五老諸峯。勢若朝拱。襲以喬杉。森然冠佩矣。殿宇漸圯。時方議修未就也。西折而北。爲朝天宮。宮在天柱峯下。制殊愜。至此始舍輿而步矣。坐憩石上。問所謂同邑趙道人者。適在道左。鄉語良久。問其兄在瓊臺者。曰瓊臺有三。今存其一。第一泉勝非孔道也。自朝天宮以上。環以紫城。爲天門者三。盤道蜿蜒。可容二人行。石磴峻整。左右欄各垂

鐵絙。攀援以登。數武之外。氣息不屬。行者或以繩繫腰。令一人前引。以助其力。徐子令從者如之。予勉力挽絙以行。屢上屢息。至三天門。足盤跚不前矣。抵太和宮。公以先至。共言推挽之艱。予因述昔人遊是山者。中道宿紫霄宮。今一日登峯。宜其憊也。太和宮在峯側。制尤愜。公齋宿爲親祝釐。從者因進曰。頃有祥光。見於峯上。予未之覩也。天未明。予與徐子先行。從香靄中扶攜而上。數折始達。天柱峯巔。道士輩羽衣雲璈。導公以至。天方辨色。罡風浩然。溱泱一氣。風止雲開。旭日東升。光射殿中。焜耀奪目。真武金像威容。赫赫若生。有掃蕩八極。凌厲九霄之概。瞻仰久之。形神俱肅。天日之表。人間未覩。像設之工。一至於斯。乃知帝王懷柔之力。亦有神焉以相之矣。從神四。龜蛇一。皆金範。殿銅冶。以金塗之。下磬文石。峯巔正平。東西稍

廣。殿東向。前對香爐峯。左右二峯。矗立如燭。因名焉。殿旁二小室。左以憩客。右有司香稅者。曰稅不及千金。以給軍興費矣。四迴銅欄。則滇民所造也。元時巔有銅亭。創殿後。徙置峯側。往視之。上有武昌民姓氏。歷朝卽位祭告碑。在石壁下。自洪熙迄於天啓。凡十二。惟崇禎無碑。問之道士。不知也。周視石壁。已無餘地。亦可訝矣。下二天門。有道人具茗飲客。啓口視之。皆兒齒。自言年七十餘矣。至朝天宮升輿。循故道行。道旁石壁。時有引繩垂瓠而下者。仰視無徑。輿夫曰。道人在岩穴中丐施者也。取道往南巖。巖特秀拔。而宮其上。北向。前後臨大壑。殿宇新葺。從殿後東折。摩天峭壁。色雜紺碧。間以石木。壁有岩穴。道士以神像叢置其間。作屋障之。衛以石欄。鑿石爲龍。首可丈許。直出欄外。置石爐其上。或往炷香焉。下視絕壑。無不股。

慄。西折一嶺。樹尤奇偉。嶺盡有臺二。曰禮斗。曰飛昇。俗稱捨身崖。往往有愚夫婦蹈死地者。公令立石禁止。并禁龍首香焉。道士列居巖下。有若蜂房。曩時山中無慮數千計。亂後盡傾。此爲僅見矣。南岩舊有徑走五龍。今已廢。公聞五龍之勝。欲取他道以往。時將盛夏。輿夫有中暍仆地者。予力止公行。乃宿玉虛宮。宮北向。地勢弘敞。規制最鉅。崇闕三橋。擬於皇居。近加修葺。邸舍皆具。沐都尉書齋尙存。公素好道家言。是日招道人王昆陽輩來會。有道人自曝於日中。聞風亦至。公皆與款接。有以殘衲至者。詭曰。此三丰真人物也。公雅慕真人。時見遇真宮傾頽。遂議修焉。明旦公之鄖陽。予與徐子往均州。道經迎恩宮已廢。入均州城。觀淨樂宮。宮被寇焚。道士新建。規制亞於玉虛。亦已半州治矣。憩於州邸。公歸自鄖陽。泛漢水還荆南。徐子爲文紀

遊。以示林子。林子曰。蜀之峨眉。楚之衡山。武當。宇內名山也。予惜未得寓目焉。徐子得其二。王子得其三。何厚幸歟。猶有憾。峨眉之洪椿坪也。武當之五龍。瓊臺也。皆以僕痛中止。聞衡山尙有茅坪。九龍之勝。亦交臂而失之。信如釋氏之說。其留爲三生石乎。林子曰。今欲卜居名山。將何從焉。余曰。昔者我友盧鹿田遊峨眉。松陵沈元子遊武當。會稽魯學半讀書衡山。三子者。嘗與我言三山之勝。由今觀之。峨眉高寒。土毛不殖。可遊而不可居也。林壑之美。琳宮之盛。莫武當若矣。抑亦祈年望仙之倫。非嘉遯之幽棲也。其衡山乎。可車可騎。亦可杖也。靡地勿泉也。泉所及爲田。所不及則圃。僧廚舉炊。不汲而至。激湍作春。起止自然。上藥名香。珍果奇卉。名筍蔬蓴。四時咸具。雖松杉之偉。不逮武當。而美箭佳林。亦可娛也。且夫魏夫人之石也。

讓遷二祖之塔也。二氏之所宗也。若乃唐之李。韓。其遊焉息焉者也。宋之朱。張。胡。林。以及先朝羅湛諸公。問道講學之區也。高山仰止。景行行止。微衡山。我誰與歸。二子莞然稱善也。是時襄敏公在京邸。有末疾。公聞之。草疏請急歸省。會有撒藩之令。疏不果上。仲秋林子還里。仲冬予亦辭歸。徐子憂形於色。余曰。我羈楚四載。爲蔡翁也。我當不負翁。子姑待之。黯然而別。

撒藩之變。自平南王尙可喜始也。可喜者營州人。天啓初。營土淪陷。軍民竄歸海島。浙人毛文龍在島上。收聚散亡。自相部署。因爲之帥。所謂江東兵也。可喜與孔友德耿仲明皆隸其麾下。爲廝養卒。漸致列校。崇禎初。文龍爲經略袁崇煥所殺。江東兵潰。可喜等航海至營州。時有用營人復營地之議。幕府收爲偏裨。我鄉孫中丞元化繼爲撫軍。拊循

倍至。尤愛仲明。命司中權。而友德以驍勇聞。未幾榆關徵兵。遣友德率以往。中道兵譁。反戈圍登州。仲明等開門應之。執元化欲奉爲主。元化拒不從。友德不忍害。縱之歸朝。遂據城叛。我師環而攻之。久之糧盡。至人相食。窮蹙無所之。復乘舟航海。乞降於清。封友德爲智順王。仲明爲懷順王。可喜爲恭順王。畀以金復海蓋四衛之地。分食其衆。順治元年甲申。清兵入榆關。吳三桂迎降。封爲平西王。畀以寧錦五城之衆。命率之征滇。改封友德爲定南。征粵西。可喜爲平南。仲明爲靖南。同征粵東。仲明軍中。私匿滿州逃人。法當死。仲明惶懼。行次吉安。中夜飲藥死。子繼茂。領其兵。粵東平。遂襲其爵。與可喜並居廣州。友德平粵西。居桂林。滇南李定國兵至城破。友德自刺死。俘其子。獻於滇。一女四貞字延齡未婚。爲亂軍所掠。旋棄之去。詔收畜

之宮中。後歸延齡。領其父兵。還居粵西。繼茂徙居閩。三桂平滇。窮兵至緬甸。執永歷帝縊殺之。進爵爲親王。置長史官屬。時辛丑康熙改元之歲也。三桂之所部。視三藩爲衆。平滇後。收諸降將。兵益強。滇池固僻饒。三桂厚自封殖。席黔國莊田之利。又滅水西安氏。獲其累世財寶無算。諸奴客。競以言利進。商賈徧於海內。遠至迤西徼外。珍寶充牣。富於天室。園囿聲妓之盛。僭侈踰禁中矣。中朝輜軒之使。爭以滇爲外府。而失職無聊之輩。不遠萬里。重趼而往。匍匐一見以爲榮。誇於人曰。我平西客也。余庚戌入楚。冠蓋舟車。絡繹不絕。詢之則皆赴滇南。爲三桂稱六十觴者也。三桂晚年益倨而嗇。漸厭客。然其聲勢。奔走天下如故。王子多尙主。三桂子應熊所尙最貴。部將吳亮。教其折節下士。歲時出其金帛。餽遺權貴。交通宮掖。勢傾中外矣。上心知

之。未有以發也。曩戊申歲。余在嶺南時。可喜年七十。與周公言。詞氣怏怏。常扼腕曰。我將歸老故鄉矣。可喜多內嬖。有子三十餘人。自相仇黨。爲身後慮。故作首邱之言。意在砥牘也。越五載癸丑。余在楚。閱邸報。則可喜果上疏辭歸。得請。次第且成行矣。先是滇餉歲四百萬。閩粵餉百餘萬。四方旣平。漸議節省。上意亦以糜餉爲慮。時內帑漸充。上率羣臣往視。命各賦詩。至是。復議汰各鎮冗兵。諸藩內自疑。及可喜疏上。果立報可。蓋陰符上意云。於是繼茂子精忠亦上疏辭。許之。三桂不自安。亦上疏辭。亦許之。一時三藩並撤。舉朝意皆難之。而上意方銳。所注重在三桂。疑其素植黨。必爲遊說。以是相顧莫敢進言者。大司農米斯翰。希旨節餉。力贊其議。朝使三輩。赴滇趣之。相屬於道。命具舟徒。待於武陵。三楚騷然。予以仲冬杪。辭蔡公歸。

自荆南下鄂渚。至京口。江干無一舟。以甲寅正月四日抵家。則三桂反書聞矣。三桂以仲冬出滇城。行未一舍。其下止不進。遂決策反。斬滇撫朱國治以徇。出黔中下辰陽。過武陵至澧州。止不進。傳檄自稱天下都招討兵馬大元帥周王。以甲寅正月卽位。僭號周元年。仍用平西親王之寶。云以示信。識者哂之。上聞三桂反。亟下詔。止平靖二藩輟行。可喜奉詔。精忠亦發兵反。當是時。湖南州郡。望風送款。長沙撫軍盧震。棄城走荆南。濱江孤城。素無重兵。人心風鶴。肘腋之下。奸謀叵測。公以死自誓。拊循軍民。絕江乘陣。拔裨將吳士英將中軍。汛防內外。備禦甚周。間諜不得行。固守三月。以待王師之至。公之力也。秦督鄂善本吳人葉姓。母爲滿州所掠。善與弟多諾幼從之遊。遂爲滿州人。時自秦調入滇。道阻於荆。公留之共治軍事。賓客咸諫。公不從。善

不悅。陰謀間公。造蜚語云。公已納質於滇矣。嘗一日衷甲入公室。公神色不動。善色沮而退。順城郡王至。公上謁。命公解佩刀而入。止從者於外。久之。王察前語妄。意乃解。善首獻二婢於王。謀齟齬公。會多諾時以總憲督餉至。力解之。善尋復調入秦。讒乃不得行。公終不言善過。或曰襄敏公舊與吳亮善。以女嫁亮子。女尋夭。時亮久死。而亮姪國柱三桂壻也。以是蜚語得生。人皆爲公危之。公深沉有度。不形聲色。惟出入佩刀不去身。妻妾室中。各置弓弦一。佩刀一。戒曰。視緩急用之可也。荆南賓客徐子。楚公輩。聞滇警。皆踉蹌東歸。遺書相問。則聞襄敏公已於正月捐館矣。公遘末疾一載。撒藩之役。心憂之。及三桂反。病遂篤。猶遣使赴荆戒子。以死守。無退志。沒後其家人私議。荆方用兵。祕不以聞。上賜祭葬。予謚如禮。至秋始以訃聞於公。公

素孝。上疏懇請奔喪。詔不許。督令進兵。先是上命順城郡王統滿州八旗兵。以三月至荆。時三桂駐澧江上。未設備。王師至。欲濟無舟。會大霖雨。匝月不止。雨霽。舟具。則已沿江列戍。壁壘相望。王師遂不敢渡。上又遣尙善貝子率兵繼至。外徵蒙古兵。下調京口。水師會於岳陽之城陵磯。九月公遣人至松招余。自滇南告變。繼以閩難。遠近震動。親友咸尼余行。予曰我四年淹楚。爲襄敏公也。今公沒。其子方在危疆。聞喪不弔。聞難不赴。交道不終。義不忍也。且吳烏知反。起兵半載。奄有黔蜀湖南之地。不能越江一步。駑馬戀棧豆。無能爲也。遂行。林子安國。以倪文正公畫一幀贈別。公題畫詩。有三徑山中彭澤酒。片帆江上馬當風之句。舟次馬當上流。寇發。商旅不前。是日大風雨。予一舟揚帆。溯流獨進。越彭澤湖口。直抵潯陽。居民方奔竄。見余舟

至。驚以爲自天而下也。舟中卽事賦詩。因憶文正詩句。若爲讖云。孟冬抵荆南信公。公見予至。悲喜交集。引予哭襄敏公像。且以出師告。仲冬自荆南啓行。凡半月。渡江至城陵磯止焉。沍寒風雨。循江東下。日行泥淖。夜宿沮洳。士馬疲頓。極從軍之苦矣。磯濱江岸。結茅作茭以棲。尙善貝子等駐營七里山上。山去岳陽城七里。因以名。公每旦赴營。日晡始歸。余詢以軍事。公曰滿洲密議。我輩不得與聞也。又曰軍中進止。俱請上命。滿洲亦不敢自專也。乃上疏請江楚會師。水陸並進。亦報聞而已。尙善嘗與三桂相識。因遣使持書。至澧招之。三桂以嫚書報。居頃之。王輔臣反於平涼。軍中偶語。籍籍微聞。進兵之法。綠旗當先。漢軍次之。蒙古又次之。滿洲居殿。時大雨雪。牛馬有凍死者。軍心漸弛。諸將時登山。行視戰地。望岳陽城。掘濠築壘。分列坎窞。

。守備甚嚴。間遣諜者偵之。貿貿而返。嘗揚言某日進兵。至期寂然。如是者非一。或遙見洞庭湖中有舟出。則水師鼓棹以待。聞礮聲。則亦發礮以應之。軍書之暇。惟高臥一笑而已。是冬司農會計天下錢穀出入之數。軍興費不貲。國用大絀。米斯翰一夕暴死。乙卯元日。曉起賦詩。却望荆南。亦有并州之感。仲春日黎明。忽聞帳外傳呼。我兵回荆矣。一時三軍歡聲若雷。遂登舟下武昌。轉遡以上返於荆南。順城郡王年少。好小勇。抵荆以來。終日嬉戲。挾彈手搏以爲樂。旁及琴弈醫卜之屬。納妾生子。不問軍事。滿兵皆效之。逍遙河上。殊無鬥志。予因私念疆場之事。一彼一此。今兩敵相持。首鼠前却。老師糜餉。是未可以歲月計也。我交蔡公父子間。自己亥迄今乙卯。十有七年矣。蜀楚之遊。亦已六年矣。襄敏公昔爲我負土計。有知己之言。心常德之。是行也。

。不敢不勉。然所以報公者。止此矣。遂辭公歸。時乙卯季春晦也。歸次吳門。忽遇張子子退。自處州歸。病體支離。相持而泣。及抵里門。林子方病起。三人皆荆南舊游。萍浮劍合。回首六年。恍惚如夢。至秋。張子疾不起。悲夫悲夫。朋友聚散死生之際。可勝嘆哉。自是浙督李公。江撫馬公。相繼以幣聘。皆以疾辭。或疑之。予曰。我不負蔡公也。戊午春三月。三桂稱帝於衡州。改元昭武。是秋死。湖南餘寇。漸引退。江上不守。己未王師始克渡江。次於武陵。上命公爲綏遠將軍。統諸路兵。公率兵先進。破神龍關。趨辰陽。下沅州。遂入黔。辛酉冬。滇南平。公功第一。詔大赦天下。○客有自滇撫王繼文幕中來者。云蔡公初入雲南。每出騶呼甚盛。滿兵不避道。公執而愬之。滿帥輒釋不問。蔡氏奴憤。伺間擒其一人。至馬廐捶之。而以擅入內室告公。公自往

告滿帥請罪之。帥拒之。相爭至面發赤。各以勅印投於前。巡撫都統爲置酒和解之。滿帥心銜益甚。及撤回。而八面觀音之說出矣。又言王公在上左右。有爲之耳目者。乘輿起居。纖悉必聞。而蔡公不能也。上密遣內侍所謂哈哈居子輩。至滇訶事先後相望。王公得先期刊布告示。以博民譽。且致餽焉。而蔡公不知也。丙寅元旦後數日。上默坐不悅。左右皆趨出。有屏間窺者。見上循殿行數週。輒凝立仰首。頓足曰。蔡毓榮。如是者再。王公聞之曰。蔡將軍其不免乎。未幾聞召。歎曰。禍將作矣。秋蔡公以啓行移咨至。王公急繕疏報上。曰使上安心。上先得蔡疏。默然。王疏繼至。上大悅。蓋心疑之也。○聞公去滇時。從者幾及三千人。其出關也。尙有三百人。中道逃者半。蓋公生平大度。御下過寬。督滇以後。其汰已甚。內則無人乎繆公之側。而左右無直諫之友。

及至斯驕滿則必覆。良可惜也。○一統志云。黑龍江在開原北二千五百里。按驛程京師至開原衛一千九百餘里。自開原以外。道里莫考。舊志殆約略計之詞耳。馬端肅東彞記略云。永樂時以大甯之地。自古北口至開原立朶顏泰寧福餘三衛。處酋之附近者。又以開原東北至松花江海西一帶。金之野人女真。分爲二百七十餘衛所。皆賜印置官。間亦以野人之向正者。爲都指揮都督統之。而松花江東北一月之程。所謂黑龍江之地。又立奴兒干都司。按朶顏三衛。蒙古皆元之遺部。海西女真。則金之別部。在開原一帶。塞外所謂南關北關是也。野人女真最遠。黑龍江殆亦野人之地耶。闕疑以俟後之誌一統者。○初三桂未反時。先遣人攜其庶孫世璠入滇。應熊不以聞。旣反。上以責主賜應熊及長孫死。收主攜二幼孫諸庶孫。並畜之禁中。盡發其先世塚。三桂死。其下擁立世璠

。改元弘化。滇城破。世璠自殺。發三桂塚。戮其屍。出其二幼孫。縊殺之。諸庶孫皆斬於市。三桂反八年而滅。延齡以粵西叛附三桂。後爲三桂所殺。精忠據閩。乞援於臺灣鄭氏。爲之濟師餽餉。尋相疑貳。上命康親王傑舒討之。精忠降。執送京師。磔於市。諸子皆伏誅。可喜旣輟行。聞三桂反。首鼠兩端。而諸子各潛通逆謀。長子俺答公之隆尤桀驁。陰養死士。謀篡父位。可喜解其兵柄。從其客金光謀。奏請以次子之孝襲爵。之隆大悲。會潮鎮劉進忠應閩。引臺灣兵至。可喜復與之隆兵。拒却之。未幾。可喜老病死。之隆卽發兵反。殺光等。及王師入粵。執之隆鳩殺之。可喜羣妾復上書。盡發諸子逆謀。皆伏誅。閩粵皆先三桂滅。瓠史曰。撤藩之變。雖曰人事。豈非天意哉。慕容農曰。取果於未熟與自落。不過旦晚旬日之間。而其難易美惡。相去遠矣。可喜盡

荒懷土。自落之果也。三桂齒亦踰耆。將熟之果也。若其先粵而閩而滇。則輔車無存。崦嵫自墜。可喜遂首邱之志。吳耿免赤族之禍。三方無塗炭之悲矣。計不出此。而倉卒掇探。致尋斧柯。孔子所謂欲速。見小利者乎。軍興未幾。帑藏告匱。言利之臣。自此始矣。加賦不已。繼之鬻爵。階級不足。給以告身。西園車滿。槐市肩摩。朱紫及於輿臺。衿佩徧於伶隸。史冊以來。所未有也。論者謂明亡於寇。目睫之見也。乃若東牟導其先驅。榆關踵其後勁。運丁陽九。貫盈緬甸。孔耿及身而斬。吳尙殄爲鯨鯢。四凶滔天。若或聚而殲之。以此始者。必以此終。嗚呼天道好還。可不懼哉。

福爾摩斯代表作

看完下面所列的八集偵探小說，便覺得其他的小說平淡無奇了，每一集有獨特的精彩，每一章有奇險的佈局，能使你哭，能使你笑，看到萬分緊張時，更能使你透不過氣來，絕不故甚其詞，凡是看過汪君著品的人，都這樣地說！

彩面神秘的殺人針(一)	汪劍鳴著	洋裝一冊	實價一角六分
彩面落魂崖(二)	汪劍鳴著	洋裝一冊	實價一角六分
彩面毒蛇慘案(三)	汪劍鳴著	洋裝一冊	實價一角六分
彩面兩世冤仇(四)	汪劍鳴著	洋裝一冊	實價一角六分
彩面半片殘照(五)	汪劍鳴著	洋裝一冊	實價一角八分
彩面梅花暗殺團(六)	汪劍鳴著	洋裝一冊	實價二角四分
彩面七山王	汪劍鳴著	洋裝一冊	實價一角八分
彩面斷頭亭	汪劍鳴著	洋裝一冊	實價一角八分

上海廣益書局發行

民國二十八年四月出版

王勝時 著

4.00

〔外埠酌加郵費〕



編者 韜 漢

出版者 廣益書局

總發行所 廣益書局

上海福州路

三三八號

分發行所 廣益書局

廣州 南京 南昌 漢口 重慶
長沙 北平 開封 萬縣 成都

文化局圖書館友聲圖書

309.40



上海圖書館藏書



A541 212 0009 3903B

